


初  
窠  
集

書



欽定四庫全書



初寮集卷五

宋

王安中

撰

表

賀正旦朔御大慶殿朝會表

臣某言一統肇端方憲始和之象九賓就列肆臨御辨  
之朝動植均和旄倪胥悅中頌恭惟皇帝陛下堯功同  
天湯德俱新履帝位而光明觀天下以中正盛陳儀於  
歲首邁漢七年謹圖事於春朝罄周六服維祺有永禔



熾無疆臣猥備方宣預欣邦慶雖切獸樽之慄莫陪龍  
闕之趨臣無任

天寧節賀表

臣某言帝乘六氣冬律應而萬寶成天佑四方聖人出  
而羣生遂中賀恭惟皇帝陛下道彌三極仁暢八埏九  
叙作歌既錫非常之瑞百神爾主用開多歷之年誕先  
星電之辰增衍乾坤之策臣限縻方任阻造路朝念昔  
稱觴夢猶聞於鈞奏迨今護塞心獨效於嵩呼

又

臣某言律中應鍾寔始誕彌之月星流華渚有開長發  
之祥凡在照臨率惟拊蹈中賀恭惟皇帝陛下道兼覆  
載功軼平成雲漢昭回煥若文章之懿雷風鼓舞赫然  
政令之新孝悌通於神明制作侔於造化蓋五帝其臣  
莫及自致重熙凡三代受命之符畢彰丕應爰及生商  
之侯肇先績禹之休日中惟亨皇建其極王猶允塞聿臻  
四海之歸天德出寧更卜萬年之永臣曩陪拱極嘗預



稱觴遠護塞垣心坐馳於北闕阻登軒陞壽徒祝於南山

賀夏祭禮成表

臣某等言禮行泰時載嚴三歲之常道格柔祇永膺一人之慶見聞所逮呼舞攸均臣聞經所重者祭祀之倫辨莫大乎陰陽之位休矣皇考既陋合祛之非至哉坤元有開專配之盛嗣逢昌運蒐講上儀紀寧貺之休辰具臻殊應奉和陽之徽冊祇薦鴻名襲用彌文聿崇熙事

恭惟皇帝陛下道參高厚功極平成居馬龍見而雷聲之時乃天明而地察御六氣之辨無所不通接三神之歡皆得而禮臣叨陪近列實預駿奔駿假無言幸陟再成之陞昭茲來許敢稱萬壽之觴

賀瀘南再捷表

并笏記

臣某等言王旅濯征深入其阻獸夷者定時靡有爭吉語遠傳歡聲咸暨中賀竊以舜格有苗而敷文德七旬舞于兩階周因獵狄而駕戎車一月至於三捷厥遭



盛旦更邁前聞師出渡瀘如動九天之上功成獻泮不  
淹數日之間力既易於建瓴勢有同於破竹山林殘種  
弗迓克奔肩輔遐陬不戰而屈實畝實籍方斥大於幅  
員我泉我池永蕩除於巢穴恭惟皇帝陛下沈機先物  
獨智如神恢下武之伐功極采薇之外治靈旗所指堅  
壘自摧上帝臨而無貳無虞三事就而不留不處敷奏  
其勇遂通道於要荒適駿有聲可告還於廟社臣幸叨  
榮祿慚之壯猷鼓愷樂以象成願上萬年之壽開明堂  
而坐治益傾四表之心臣等無任 笏記 夷寇憑陵天  
兵奮伐甫奏鷹揚之勇亟臻蟻聚之平恭惟皇帝陛下  
聖武布昭神心經緯陳師鞠旅出成算於中天折馘執  
俘震稜威於裔土外開禹跡上廣文聲以矢其音式集  
四方之賀無思不服敢揚萬壽之休

賀湖北路奏捷表

臣某等言 夷寇憑陵天兵奮伐縱其羣醜殲厥渠魁  
捷奏遠傳歡聲咸暨中賀竊以溪徭匪茹屢干紀而不



除邊吏苟安或弛兵而弗戒乃容嘯聚敢肆跳梁王旅  
嗾嗾往專求於首惡虎臣矯矯茲亟奏於膚公遂訖兵  
誅殆無噍類國威震疊八蠻知懼以寢謀地利并包百  
世可因而無患恭惟皇帝陛下神心經緯聖武布昭出  
聖算於中天申大刑於裔土赫赫濯濯遠收不陣之功  
蕩蕩巍巍丕顯無前之績臣共叨榮渥親遇熙隆廣文  
之聲願告成於廟社陟禹之迹更通道於要荒臣等無  
任

賀環慶路奏捷表

臣某等言 黠羌潰走叛黨誅夷陳原野之大刑據山  
川之利勢神祇助順海宇均歡中賀竊以兵義者王師  
直為壯蠢彼負恩之小寇連茲干紀之外戎我用有征  
人斯共憤果憑勝算大挫兇徒賊雛授首於軍交醜類  
枕尸而山積籍其田畝守以金湯地包種落之膏腴天  
設封圻之險固恭惟皇帝陛下懋昭剛德丕顯駿切惟  
斷乃成爰舉萬全之役咸劉厥敵用申九伐之威方所



向之無前顧何求而弗獲臣叨朕輔拂竊預榮懷如雷  
如霆莫助鷹揚之勇于疆于理即觀蟻聚之平臣等無  
任

賀瀘南奏捷表

臣某等言 遠夷負固王用濯征我旅奏公天惟順助  
捷音迅至歡頌交興中賀竊以舜格有苗蓋未忘於舜  
羽周疆南海亦屢戒於戎車方隆道德之疆坐繼詩書  
之述夫何蟻聚輒肆狼心天討時行莫予敢侮皇威外  
震弗迂克奔無爭將偃於師干有截更恢於輿地恭惟  
皇帝陛下仁心溥博剛德布昭睿謀矯矯而神行聖武  
煌煌而火烈申嚴九代聳動八方乃觀厥成蓋有寧人  
之指以戰則克共知上帝之臨臣親遇休辰共霑榮渥  
稱觴黼座敢揚萬壽之休獻凱旌門益壯六軍之氣臣  
等無任

賀三山新河行流表

臣某等言 神機獨運得隨山濬川之方經瀆全回資



造舟為梁之利履函所暨呼舞惟均中賀竊以導河至  
于大伾稽古有曰文命簡編尚矣形勢自然鬱層阜之  
可疏曠前修之罕議會逢聖作動輿道謀奮英斷於俾  
來之初授成算於股引之際所助者順有開必先入皆  
勸趨役亟告就歲繇蠲息可寬東郡淇園之憂天險長  
雄豈特長坂盟津之固恭惟皇帝陛下德充三極政協  
九疇天且弗違水無不下誕先登於岸迺推濟物之仁  
永賴時乃功用播翕河之頌臣等共塵榮渥親覲休風  
無有後艱當首四方之賀聿懷多福莫窮萬壽之期臣  
等無任激切之至

賀河平表

臣某言一德享心皇天眷佑百神受職經濟安流洊書  
大有之編永絕橫流之患盛超古昔騷動邇遐中賀臣  
聞王正其道以理川水得其性則潤下同入于海禹勤  
乃訖於中邦允猶翕河周盛用升於喬嶽會逢熙運効  
見休符恭惟皇帝陛下智叙九疇政修六府是興神物



環泰鼎以奠方告厥成功執玄圭而端命專禮后祇而  
天明地察不壑鄰國而本固邦寧燕及渾波桃屢華而  
弗溢循於正道新不屬以非憂將觀軒后之馬圖共陋  
漢成之年紀臣頃居起部預奉睿謨暨茲尹正之行親  
覲懷柔之馳稱慶莫趨於北闕傾心但祝於南山臣無  
任

奏賀乾寧軍黃河清表

臣某言 率土底平丕顯無前之績澄瀾恊應於昭滋

至之休凡屬照臨莫不鼓舞中賀竊以靈源五色符帝  
王之作興曠世一清見古今之紀述雖曰流傳之不妄  
猶疑闕絕而無聞事出非常理宜有待惟章聖之在御  
偉大中之發祥聳動綿區焜耀方冊創業垂統傳休德  
於無窮繼體守文格珍符之委至矧乾寧建疊之所當  
洪河入海之衝會源委以來同宜休嘉之濬發克臻景  
貺厥邁前芳恭惟皇帝陛下宅心唐虞比肩文武無一  
物之失所致萬國之咸寧孝極奉先水皆潤下撓之不



濁漭千里之渾渾巍手有成慶一人之穆穆臣叨特從  
橐假守塞垣眷此殊禧見於屬部究觀前史允為千載  
之逢遠迹大廷莫預四方之賀臣無任

賀德隆殿芝草表

臣某等言閔宇寧神靈芝薦瑞昨有邦之駿命垂永世  
之徽音慶事系傳歡聲成暨中賀竊以至誠能化有感  
必通和氣致祥無幽弗屆緬懷碩媛嚴奉辟容王假有  
家既厚追崇之禮天監在下用昭滋至之休煌煌三秀

之英奕奕二南之效恭惟皇帝陛下清心體道正德御  
邦申禘衣禴翟之恩有闕睢麟趾之應巍巍蕩蕩同帝  
堯之無能名肅肅雖難乃文王之所以聖是宜懿淑默  
助嘉祥臣幸列近司無禪美化莫不好德蓋彰彤史之  
光維以遂歌當陋齋房之作

賀宣和殿玉芝表

臣某等言 德際乾端祥開帝所密依丹檻並秀瓊芝  
慶集自中騅均無外中賀竊以元封有獲僻在甘泉之



後庭神爵所誇下侵函德之承雷詎覩靈華之雙吐  
當燕處之九重鍾協氣於堯階迎清光於舜目蓋監觀  
之有赫曾咫尺之不違恭惟皇帝陛下體道象先玩心  
物表撫四海以精神之運成萬化於蠖濩之中仁恩雨  
施而雲行聖知金聲而玉振允宜嘉瑞近出邃嚴臣竊  
幸逢辰共深載后如天人使之無間罔有二三如山阜  
以莫不興將延萬億

又賀中書省玉芝表

臣某等言 聖政修和仰格上穹之睟靈芝挺秀俯當  
右省之庭若見輿聞或歌且嘏中賀竊以紫微邃宇清  
禁近隅肇自先朝任專進稟嗣開盛旦名正弼諧凡立  
經陳紀之太猷與繼志述事之美意登崇俊傑修講禮  
文本睿訓之發中致治功之冠古坤輿薦祉神草告休  
密抱附於菊枝瑩輪園之玉色所臻若此其應不虛恭  
惟皇帝陛下祗紹丕圖適迨先烈撫萬邦而作又綜百  
志以惟熙后克聖不命其承自凝庶績天無親惟德是



輔用錫嘉祥臣叨列近嚴慚無調燮親覩晨華之異更  
紆神筆之褒旅同穎之未願比周書之歸美賦再榮之  
柳竊嗤唐史之溢辭

賀五色雲表

臣某言神物應期方展大廷之拜慶雲承日共知上帝  
之臨在列咸觀綿區溢喜中賀恭惟皇帝陛下緝熙天  
業膺受珍符堯有成功而巍巍禹會羣后而濟濟石文  
前告已彰四字之奇天表相通更呈五色之瑞二儀並  
貺萬壽攸崇臣職限守藩心勤存闕竊幸休祥之雜選  
第歌雅頌之昭回臣無任

又

臣某等言俊德昭升上穹純祐大明久照鄉霽相輝瑩  
視所同歡聲咸暨中賀恭惟皇帝陛下中正履位文明  
應天物蒙大澤之油油帝賤小心之翼翼慶雲在上絢  
五采以爛然白日顯行彌四方而仰止占有太平之喜  
冠諸可致之祥氣非霧而非烟福如幾而如式昔葩葉



告勝符於泳野若龜龍發歌詠於虞廷五帝殊時萬世一  
遇臣共霑寵渥實與榮懷天聰天明方輔惟馨之德雲名  
雲紀願揚滋至之休臣等無任

賀開封府甘露表

臣某等言神都空圉本帝德之好生仁澤零庭見天心  
之助順適契誕彌之月有開長發之祥中賀竊以刑措  
者帝王之極功露降者天地之相合惟此四方之會坐  
環千里之畿惠自上孚事皆中覆星流華渚當聖旦之  
俯臨草鞠園扉屬嘉師之無犯積是和平之氣溢于大  
衆之區乃霑雲表飴醴之滋在彼府居杞棘之上天難爰  
道帝用與齡恭惟皇帝陛下聖治隆寬風化率籲商邑  
翼翼首熙冬月之溫湯網恢恢盡解秋荼之密允宜靈  
液來應昌期臣四備四鄰敢稱萬壽垂恩儲祉詎須漢  
掌之承翻潤流甘願覺魏盤之隘臣等無任

賀太常寺甘露表

臣某等言容臺相禮仰承制作之功膏露効祥俯示



顧懷之意燾臨所既拊舞胥同中賀竊以在昔治時數  
霑仁澤孝宣之神雀五鳳世祖之建武中元近但止于宮  
庭遠或彌于郡國應誠而至惟帝其難眷直清惟寅之  
司有盛大常存之義備太平之庶事兼成秩于無文蓋  
盡制盡倫作者謂之聖故如飴如醴莫之令而均恭惟  
皇帝陛下孝極繼承道該損益是正百王之陋若稽三  
代之隆穆穆新儀神祇祖考樂此穰穰嘉瑞松栢竹藟  
受之臣叨被寵榮並逢熙泰合天地之化欣已格于殊休  
修山嶽之封願遂觀于曠典臣等無任

賀延福宮竹上甘露表

臣某言  
旻霄協氣應一德之馨香禁御叢篁浥萬珠  
之飴密系傳嘉慶胥集懽愉中賀竊以九重通紫太之  
神衆產襲堪輿之粹如竹苞矣知本固而根深零露滑  
兮示澤流而恩洽恭惟皇帝陛下體真順則凝命宅中  
物咸昌于至仁帝永綏于多福天故不愛其道申降美  
祥人莫之令而均共陶醲化臣方承優寄阻綴賀班洋



洋親聽于民聲栩栩獨尋于帝所臣無任

賀甘露翔鶴表

祠于巖鼎之宮有甘露降奏樂致謝雙鶴飛翔于帝殿上

臣某言作樂告成先民時若制器尚象惟聖為能宜協  
氣之橫流致嘉祥之並至中賀恭惟皇帝陛下高厚配  
于天地孝悌通于神明凡文武齊聖以起治功皆緒餘  
土苴以為天下厥有因革其盡精微貢九牧以照神姦  
珍符來寓方一變而致羽物遠古有稽共欣不世之逢  
是為太平之象臣任叨紫塞阻陪鸞鷲之班目斷彤庭  
徒結雲天之戀臣無任

賀帝萬成表

臣某言萬萬告成肇稱緝禮冕旒受慶哀對鴻禧覆情  
所臨歡呼咸暨中賀竊以軒帝幸興三鼎是用大亨夏  
后爰鑄九金以圖百物自禹而降莫得其直逮漢以來  
烏覩其瑞天祚明德人與成能灼知一言之孚深發獨  
智之蘊作新大器增重皇基睿謨俯授於工師神寶遂  
隆於國鎮茲為能事曼邁前修恭惟皇帝陛下淵懿測



靈聖神用妙聲身中律度之數制作軼河洛之文繫象  
具昭舉百王已墜之典規模特異承萬世無疆之休消  
擇令辰丕膺景貺龍文光潤本川嶽之效珍日景晏溫  
宜天地之協應播紳聳視海宇傾聞臣託備藩維阻趨  
朝路歎周南之滯莫預盛儀存魏闕之心但勞昔夢

賀開封瑞應治效表

臣某等言 邦畿是宅帝德攸施神降嘏而產祥諸福  
畢至人遷善而遠罪比屋可封盛冠簡編慶均寰宇中

賀竊以惟民所止茲為衆大之區承王之休積有中和  
之澤屬聖神之在御格上下以交孚於皇來年誕降嘉  
種膏露靈芝之紹應嘉瓜瑞木之駢生道不拾遺庭無  
留訟桁楊弗用桴鼓稀聞節義出庸衆人之間閭里敦  
士君子之行皆太平之象所宜有者故內史之地今多  
見之恭惟皇帝陛下躬秩大猶懋昭來孝皇建其極既  
表正於庶邦道兼于三乃和同于一氣無遠弗届永觀厥  
成臣親遇隆熙幸塵榮渥若時百辟巍巍共仰於堯功



維爾四方翼翼更尊於商邑

賀開封府翔鶴表

臣某言 陽月初吉肆臨履武之辰天府攸居載集鳴  
臯之類嘉祥協應驩詠交騰中賀竊以夢上帝之與齡  
但傳周室頌聖人而使壽不越華封未聞星虹將至之  
期有來翔鶴難致之物翩翻仙馭呼舞神州厥數至于  
三千之多其符若曰億萬之永恭惟皇帝陛下道彌覆  
載功格平成躬既聖而不可知德為天之所大奉究彼  
冲飛之瑞昭茲眷顧之休翔觀象之門實導六龍之迹  
邁臨首善之地又先四海之祝延臣驟遠清光頻聞慶  
事莫預造庭之列但深存闕之誠臣無任

賀寶籙宮翔鶴表

臣某等言 日馭天臨列霓裾之萬象臯禽雲舞來金  
闕之千尋凡遠見聞率同忭蹈中賀恭惟皇帝陛下研  
幾物祖觀妙道樞躬既聖而不可知德為天之所大奉  
夙膺帝訓崇護真風乃附紫垣肇新琳宇明馨玄酒通



胖嚮於叢霄寶劑靈符起呻吟於比屋異人間出上帝  
居歆親屈至尊往陳廣會宜颯遊之降集驂羽鶴以徘徊  
徊蓋高真象妙之心眷于一德託久視長生之類介以萬  
年臣幸遇熙辰具叨榮渥自天祐也幸觀感格之誠其子  
和之敢急對揚之義臣無任

賀翔鶴竹木表

臣某言 仙禽天降映雙闕以來翔練實秋登燕七閩  
而與足慶聞當宁歡浹綿區中賀竊以鶴鳴在陰非真  
靈之莫使竹粒如麥徒夙昔之有聞徘徊象魏之多衍  
溢倉箱之富聿彰殊祉允屬熙辰恭惟皇帝陛下體道  
窮神虚心植德貫三儀而並貺妙一氣以同和於昭上帝  
之臨屢來羽物克篤曾孫之慶既劬田功故端闈紛胎  
化之羣而下土獲鳳餘之食用介無疆之萬壽示將不  
改於四時臣職祕宸嚴任隆都會望堯雲而手舞伏魏  
地以心馳臣無任

賀連理木表



臣某言 清禁宅尊首泰和之一氣靈柯連理昨景命之萬年喜動內朝觀均綿宇中賀竊以木曲直而中合有開必先天聰明而下臨惟德是輔恭惟皇帝陛下道施六府政順五辰省山獲大吉之符在沼薦駢華之祉偉茲上瑞密當咫尺之天申以繁禧益永春秋之歲臣叨榮寢舊賴慶特深伏魏地以心馳嚮堯雲而手舞臣無任

賀朱草表

臣某等言 天子能致之資上穹日盪火德自然之應瑞草時生昨景命以增隆紀信編而特煥慶歸當宁歡浹綿區中賀竊以佑民而作君師施德而至草木則有異卉宛如渥丹太清無為嘗偕甘露而薦祉上古至治廼配嘉禾而效珍屬盛旦之開先冠衆祥而創見萍實相輝而獨茂珊瑚枝對聳而更柔申錫中天告寔昌之炎運聿來南土表麗正之離明惠我無疆臨下有赫恭惟皇帝陛下道參化育功極平成帝既眷而省山神亦懷



而受職法星順軌暘日重輪咸曰休哉屋既流於赤羽  
和之至也野復秀於朱萌泥金可驗於幽經染絳用華  
於皇帝食斯不老占壽考之萬年炳且弗渝巨本支之  
百世臣共勤戴后每幸逢辰悉至於廷固難名於聖妙  
並受其福徒有賴於邦榮臣等無任

賀河中府蟾蜍背生芝草表

臣某言 聖神至化旁流龜雉之淵天地中區羽見蟾  
芝之瑞慶符興運歡浹羣情中賀竊以神草之生帝功  
攸天然附根盤石淮王或曰不能故連葉銅池漢代以  
為丕貺歷攷簡篇之舊述未聞木肉之同和邦其永孚  
于休天之所助者順乃因熙洽首效殊尤恭惟皇帝陛  
下道實二儀仁充四表虞氏之恩被動植既聽簫韶之  
成周王之德及昆蟲方來臺囿之樂干戈載戢壽考維  
祺煌乎可致之祥具此非常之應臣限縻事守阻造班  
聯聆福物之系傳同輿人而率舞

賀平定軍白兔表



臣某等言仁施動物各得其宜兔擾中林不浴而白慶  
昭圖牒歡動幅員中賀竊以明視之生有難窮之三窟  
褐衣者衆無不駸之一毛惟威折於陰幽與化馴於狙  
詐無思不服覲德則純然後不角不牙秀出中山之族  
自形自色皎同空谷之駒天方厚於休明地兼名於平  
定厥祥有此其應可知恭惟皇帝陛下通妙羣生智明  
庶慝克招携而懷遠乃用夏以變夷宜月魄之效寄示  
帝心之助順德罔二三之所致豈諄諄然命之乎歲逾  
五百而來思故皞皞不可尚已臣共逢昌運欣睹珍符  
紀周宣舞鎬之年外攘復古按韓愈辨徐之說不戰來  
戎臣等無任

賀白兔野蠶成繭表

臣某言  孕靈月魄玉色惟純薦祉桑田冰絲可織二  
邦時奏萬宇均歡中賀竊以至德之光無遠弗屆諸福  
之物厥類惟彰瞻高密之近區獲明視之素質驗仙經  
之壽則既滿五百歲占金行之祥則當服西南夷又茲



野繭之成豈但農疇之慶獻於良日用惟黼冕之共祀  
 及先蠶應在禱禴之助恭惟皇帝陛下道包衆甫化底  
 丕平熏然一氣之和以作動物燕及八紘之廣豈曰無  
 衣宜登天產之珍昭示帝心之格中林肅肅乃創見於  
 神奇十畝閑閑初不勤於條采臣親逢熙洽竊預榮  
 懷賁然來思樂文王之在囹服之無斁仰軒帝之垂裳  
 臣等無任

賀紅鹽表

臣某言 天子躬能致之資邦風有赫火德示自然之  
 應池鹵凝紅曠古希聞羣生成喜中賀竊以郇瑕之野  
 濬發利源祥符以來肇登瑞牒蓋地不爰其實則邦永  
 孚于休恭惟皇帝陛下孝奏神明功昭祖考天奉之非  
 人力所欲弗違祥多者其國安於斯為盛臣猥司宮鑰  
 阻造闕廷第訝炎運之隆莫對清光之近臣無任

賀石中有明字表

臣某等言 造基重屋乃天人合應之期伐石他山有



日月相推之象光超前載歡洽羣情中賀竊以物有悍  
堅蓋不誠未能動者帝將啟佑則以行與事示之惟陽  
館之肇營實聖謀之默契經始勿亟方施礮密之勤吉  
事有祥爰發嶢巖之蘊陽融陰結玉質金書諒由太極  
開闢之初已兆聖時嚴配之盛文在中也天何言哉恭  
惟皇帝陛下體道宅尊求端順則祇守聖人之寶聿興  
王者之堂嶽立雲垂一定工圖之大龍跳虎臥再觀宸  
翰之奇宜申命於上穹因効靈于巨礎信彼山川鬼神  
之類罔不是依較夫河圖洛書之求此尤有赫臣恭逢  
極化親覲殊休握乾符而闡坤珍方隆坐治舞后功而  
詠君德敢忘對揚臣等無任

賀芝草瑞穀並生表

臣某等言 和氣致祥荐生神草大田多稼密附靈根  
天寔申休物因效祉中賀竊以曾孫來止乃臻百穀之  
成上帝博臨斯有九莖之秀惟天人精禘之相感則禾  
菽交貫而因榮有開既堅既好之初無害或耘或耔之



際豈止三農之慶蓋彰一德之符恭惟皇帝陛下道格  
二儀仁施九壤受小共大共而有駿厖之惠即康功田  
功而無盤游之娛茁彼晨華方永綏于多福託于秋隴  
將迄用于康年臣無助財成幸觀昭假詠歌周道願陳  
高廩之篇回復漢都竄陋齋房之作

又賀瑞穀芝草表

臣某等言嘉穀盈疇寔玉斯活靈芝被野既庶且多有  
煒冊書均歡寰宇中賀竊以異畝同穎蓋常見于周邦  
連葉九莖亦僅生于漢殿未有蕤蕤之稼協穗如雲煌  
煌之英貢篚系道會南陽之凡數登百者三來安化之  
提封號萬者五允謂非常之瑞感超振古之傳恭惟皇  
帝陛下凝命穆清玩心昭曠政格九功之叙德通四氣  
之和燕及皇天用集歸禾之祉震于珍物更繁產草之  
祥臣竊預榮懷幸觀孚佑自今以始共慶千倉而萬箱  
無疆惟休永對一年之三秀

賀鎮海軍等祥瑞表



臣某等言 上天之載無聲所助者順諸福之物畢至  
永孚于休歡動綿區慶歸當宁中賀竊以道大天大地  
大王位其中心和聲和形和氣無不應自一人之有格  
罄六合以來符膏露咸濡靈芝競秀木衆支而內附  
竹並幹而同榮帝貽來牟多至五穗園有嘉卉類成雙  
葩告萬壽之期則長春層敷示百男之兆則天桃駢寔  
金花絢彩冰瓦藏文胎仙翱翔鷲鳥衛翊介寶六眸而  
玉質孺禽再獲而雪衣郡國相望以上闡品類不可以  
遽數恭惟皇帝陛下道超振古仁及羣生奉三無私以  
又邦有萬不同以成福膺二儀之景命永言保之披四  
海之瑞圖維其時矣臣親逢熙洽竊預榮懷鋪張願告  
于神明紀錄幸光於簡冊於斯為盛欣共對於王休以  
莫不增敢載賡於天保臣等無任

賀深州等處衆瑞表

臣某等言 皇天眷命方昭可告之功品物流形並效  
非常之瑞慶歸當宁歡浹綿區中賀恭惟皇帝陛下道



妙範圍誠參化育五者各以其叙既鼓舞之以盡神萬物皆出于機雖雕刻而不為巧乾端墮祉坤載產祥美光燭而膏露零綠竹寔而嘉禾茂岱宗望幸紛三秀之芝房泮水承風蔚雙敷之蓮萼六榴共本衆木并柯二犢同生八蠶自繭舞鶴來翔而玉質胎禽下集於琳宮惟六府三事之修百神爾主故四海九州之大萬福來求臣親遇熙辰竊霑榮渥鹿濯濯而鳥嚮嚮已邁前聞麟儀儀而鳳師師更期創見臣等無任

賀汝州等祥瑞表

臣某等言 聖功丕格神人以和福物沓來天地竝貺盛超千載驩逮八紘中賀竊以國安多祥氣順成象郁雲霄之五采紛芝菌之九葩麗譙儀羽鶴之羣析薪出金僊之字如竹苞矣零露滑芳同穎雙歧有相后稷之稽合枝並蒂知涵虞氏之恩鋪張闕休昭受上帝恭惟皇帝陛下德施日普道化川流克寬克仁而信兆民時純熙矣不難不竦而總百祿天人奉之乃集三靈之釐



荐受四方之賀臣竊深賴慶咸俟勒成卜名山顯位之  
登乃并是吉延共貫同風之祉於萬斯年臣等無任

賀麟州等祥瑞表

臣某等言 帝命不違眷于一德天休滋至覃及四方  
凡在燾臨惟胥鼓舞中賀竊以諸福之物其出同時百  
順之名蓋彰有道芝房競秀華萼駢敷庭零膏露而自  
均地湧醴泉而不受壽龜游於蓮葉異鵲馴而雪衣桃  
雙寔以協多男之占木并柯以象殊俗之附自郊庠而  
効見跨邊鄙以來符應誠兼德於三靈按牒殆踰於十  
計恭惟皇帝陛下治超邃古澤浸羣黎聖功上際而下  
蟠仁化東漸而西被神降明出祥多國安保合太和通  
天下之一氣緝熙純嘏介君子之萬年臣幸列近司預  
觀衆瑞願揚丕烈登泰山以告成更集珍符開明堂而  
坐治臣等無任

賀汝州等祥瑞表

臣某言 聖人執契廣動化之中和天瑞應誠偏版章



之士宇光超載藉歡浹羣情中賀竊以躍舟臨屋之符  
其臻未衆歌廟紀年之事厥類惟微方上帝之眷臨觀  
諸福之畢至仰則甘露景雲之薦祉俯則靈芝嘉穀之  
效祥木多相合之條支草有自雙之華寔竹垂黃蘗或  
穿栢節之堅鶴聽玉音亦集詔文之上昭示眷命者率  
再三出具列奏對者凡五千餘蓋協氣之橫流自生民  
而未有恭惟皇帝陛下中正履位聰明憲天成鳧鷖既  
醉之休跨魚麗華黍之盛德無遠而弗屆四方攸同神  
有開而必先百祿是總物其多矣皇則受之臣親遇熙  
辰頻瞻景貺陳常時夏允無此疆爾界之殊哀對敷天  
不勝喬嶽墮山之望臣等無任

賀中山府慶雲等衆瑞表

臣某等言 慶雲在上仰占紉郁之輝和氣致祥俯驗  
盛多之物函封狎至塗頌交興中賀竊以莫高者天所  
親惟德有生之類可妙以神乃若雲呈五色之符油油  
表瑞地蕃衆萬之品一一效竒聿觀紹至之休允契丕



平之運恭惟皇帝陛下功隆下武道協重華毓萬彙以無所不愛之仁贊二儀以大而能化之聖財成輔相所左右者神祇祖考以安樂之乾端坤倪雖遠而必屆川珍嶽貢不約而自來臣幸造明庭願施大澤通天下一氣誕包有截之區介君子萬年用衍無疆之歷臣等無任

賀日暈慶雲并泰寧軍等祥瑞表

臣某等言 至德要道通於神明協氣嘉生塞乎天地祥編屢溢歡頌交興中賀竊以敷政而百祿適受祐而四方賀日騰瑞氣雲絢慶霄醴泉膏露之涵濡羽鶴介龜之游集神芝薦祉植物效休由觀象於璣衡合奏章於郡國遠近三十餘所寔跨幅員大小七百有畸並應圖牒恭惟皇帝陛下道參遠古澤浸羣黎超夏禹之平成極周文之逸樂萬物由儀之效維以遂歌九州共貫之祥莫不畢至臣並承寵渥竊預榮懷握乾符而闡坤珍方延億載舞后功而詠君德願答三靈臣等無任

賀荆南等處祥瑞表



臣某等言 聖人執契與物皆昌天瑞應誠如川方至  
慶歸當宁歡逮綿區中賀竊以祥多則國必安民和而  
福乃降帝命率育有野蠶繇穀之貽天德出寧多仙鶴  
異花之應大巧至形於獸石靈華更茂於神芝百果用  
成多男是卜衆支內附殊俗攸同蓋九功有惟叙之歌  
放諸四海故萬物以不詘之理媚茲一人恭惟皇帝陛  
下道與天通業侔地富虞氏之恩被動植既聽簫韶之  
成文王之德及昆蟲有來臺囿之樂宜通率土並薦嘉  
生是謂質諸鬼神而無疑予以編之詩書而不愧臣共  
深感遇尤幸對揚德罔有於二三已格清寧之既物自  
至者十五何辭云岱之封臣等無任

賀真定等處衆瑞表

臣某等言 聖神體道通元化之機緘天地應祥順太  
和之橐籥滕章累至舞手胥歡中賀恭惟皇帝陛下統  
粹精位履以剛中正受命既固降福孔夷達於得一以  
生之情來為有萬不同之瑞竹蕢其實露凝如飴灼灼



之華秋敷懔懔之麥冬秀禾駢穎熟蟪抱草枯沼毛多  
 連帶而芳陸產或合同而化九莖附石黜淮南俄度之  
 凡二米共稔協后稷肇禮之慶有邦並貺惟聖克承按  
 牒披圖知天心之所助紀年薦廟宜帝命之弗違臣共  
 幸親逢尤欣先覩自今以始方迎時萬之休其類維何更  
 闡日新之盛臣等無任

賀雙桃眾瑞表

臣某等言 明德惟馨乾坤率籲至誠能化符貺大來

班賀相仍冊書有繼中賀竊以高卑異位上天之載無  
 聲遠邇同風諸福之物畢至寶龜玉質異鵲霜翎康年  
 多稼穡之祥順氣鍾水陸之彥野蠶自繭木蠹類蟬雲  
 起封中啓玉檢告成之禮鶴來天寶當琳壇本始之辰  
 道方六闢而四通言猶一掛而萬漏恭惟皇帝陛下中  
 正履位聰明憲天臻鳧鷖既醉之休跨魚麗華黍之盛  
 集三靈之景命永言保之披九壤之瑞圖維其時矣臣  
 叨聯輔拂莫測範圍咸造在廷共頌無前之績敢拜稽



首願揚百世之光臣等無任

賀台州嘉禾一稔二米表

合宮定位方鳩僊功嘉種應期以歸肇祀懷生共慶有  
開必先中賀竊以寧神者以四表之歡心用粢者資二  
米之和氣洽豐年之酒醴升至治之馨香實於卣尊酌  
以圭瓚周公之成洛邑式舉明禋平王之錫文侯是昭  
顯德於赫海邦之獻允符陽館之榮蓋九筵九陛之規  
於茲有作故一陰一陽之道用薦厥祥天與人謀物為  
時出恭惟皇帝陛下道心淵靜聖政中和闕休翕受於  
二儀曠典兼隆於三代欲躬行於嚴配且肅備於裸將  
廣文王之聲芑自來於豐水誕后稷之穡秬果降於有  
卽臣叨列近司竚觀休享申早麓之百福黃流在中詒  
漢江之萬年令聞不已臣等無任抃躍之至

賀河南府嘉禾芝草同本表

祥發陪都慶闡當寧覆函所逮呼舞惟均中賀竊以禾  
獻周邦以篤曾孫之喜芝生漢殿於昭上帝之臨雖薦



祉於一時實効珍於二本未有陰陽之異產並蕃河洛之奧區協穠殊莖儼仙英而競秀吐柯載葉附長畝以爭竒恭惟皇帝陛下道參化育功格平成孝弟感通翕受神靈之貺慈仁熏浹存臻草木之和是謂非常之時有來諸福之物臣猥叨分闡莫遂造廷嘉頌傳聞識崇寧之丕應瑞圖雜驗知大觀之無疆臣無任抃躍之至

賀蘄州芝草表

臣某等 聖德動天靈芝薦地多踰萬本應萬壽之無疆中出九莖表九功之惟叙光騰圖牒歡見幅員中頌竊以神草之生仙經具載飛鳥升龍之狀貫珠偃蓋之形紫雲飴露之所濡石室金堂之是閔為此蘄春之獻統於魏闕之陳色備焜煌儼肪截而栗潤氣相回覆分櫛比而墉崇既庶且繁於斯為盛恭惟皇帝陛下道心朝徹孝治日宣帝省其山首驗由儀之化物和於野共霑行帝之仁允宜三秀之英併有一人之慶臣共承丕貺尤幸縱觀備禮以告神明願同周室下詔而賜牛酒竊



陋漢家

賀亳州太清宮紫芝表

臣某等言 天垂純祐地薦嘉生示基祚之重熙介聖神之萬壽若聞若見或号或歌中賀竊以三秀敷歲遠但傳于靈囿九莖茂蔚近或產于齋房未聞還丹五色之餘忽效吐葉千層之瑞恭惟皇帝陛下恩漸動植孝奏神明具來申錫之休載獲博臨之貺有本者如是式符蔓蔓之期無不爾或承更衍穰穰之祉臣限縻藩閫阻造闕庭無任

賀湟州瑞金表

臣某等言河湟故壤德罔不孚天地珍藏時然後出慶均遠服歡溢中區中賀竊以國有五材金凡三品若時上幣獨貴精鏐彭蠡既瀦貢始來於揚土淮夷卒獲獻方集於魯邦發于隨山刊木之餘得必橐弓戢戈之後睽西戎之即叙嘉舊俗之惟新我陵我阿實畝實籍既大同於一氣於變時雍乃崇降於百祥不愛其實恭惟



皇帝陛下誕膺駿命純祐多方躬堯舜孝弟而力行復  
文武疆土而加闢浮于積石載歸輿地之圖自彼氐羗  
悉入邠人之掌是臻神物以顯伐功臣竊預邦榮幸觀  
廷列遂通絕域詎須宛馬之齋用紀休符豈但漢麟之  
鑄臣等無任

賀越州瑞金表

臣某等言天其申命福物既充地不藏珍吉金自出見  
聞所逮呼舞惟均中賀竊以鏐盪之英堪輿所閱鑿山  
十丈深或困於披沙韞石千年久難期於化玉未聞澤  
銑近獲膳田發應社之神光參禹書之貢品雖我無事  
而民自富貨且弗居蓋乾知始而坤作成寶宜不愛恭  
惟皇帝陛下道施六府政裕五材聖集大成聲自全於  
條理言從作又事兼叙於彝倫仍格休符以資美利邠  
人何力有同林邑之流內府是歸奚帝櫟陽之雨臣幸  
塵眷渥莫測範圍紀昆田之祥寧鑄裏蹠之狀條岱宗  
之祀願泥玉檢之封臣等無任



賀潭州瑞金表

臣某等言道格坤輿不愛其寶祥開湘土厥貢惟金景  
貺繁臻歡聲咸暨中賀竊以禹平三壤治先六府之修  
箕述九疇事首五行之叙惟精鏐之所產實美利之攸  
資遠或閔於嵌巖細殆煩於披揀有來珍物爰俟聖時  
神發山藏天成魄聚重兼百鎰可輕巢水之樽粹甚雙  
南不待襟陽之雨恭惟皇帝陛下業侔地富德與天通  
政以格民無憾養生之厚言惟作又不違從草之和允  
宜寶藏之興大受邉人之獻臣幸聯黼黻無助財成入  
內府以奉王褒蹕何用祀明堂而配帝金版是恭臣等  
無任

賀辰州收到楠木表

臣某等言 合宮經始天且弗違大浸發祥木不勝用  
流聞四海欣喜一辭中賀竊以聖人作興有莫致而至者  
上帝眷顧不待求而與之惟重屋之肇營非前王之敢  
議九筵宏構方密考於周官十仞瓌材已交浮於沅水



先登於岸有覺其楹初無虞衡斤斧之勤並中工師尋尺之度時哉景運貺此大功恭惟皇帝陛下光紹丕圖懋追先烈欲順時而布政思嚴父以配天乃恢萬世之基爰定一堂之制神祇祖考之意咸俟慶成山林川澤之靈並來休應以佑我將之享蓋隆大壯之規臣親列近巖竚觀輪奐孔曼且碩大奕奕於魯宮方斲是虔邁九丸於商寢臣某等無任

賀仙井監宣聖座生芝草表

臣某等言儒風丕變芹滋泮水之宮聖德潛通芝之秀尼山之像光昭史冊歡浹民謠中賀竊以三代皆以學而明倫斯文未墜萬世一遇聖而知解其教乃隆歷觀徃辟之規徒謹素王之祀天地之全未覩道術之裂莫同逢神考之作興表章六籍迨皇明之紹述鼓動四方議銷搖沮之徒法備賓興之美自上都而首善罄率土以承流衡統紘綆有儼大成之宇金石絲竹或聞數仞之墻所存者神如在其上乃產九莖之瑞默彰一德之



交恭惟皇帝陛下道本生知聖由天縱息邪說距詖行  
亦既率從下明詔發德音每先樂育郡國增生徒之數  
蕃夷遣子弟之來嘉氣迎輿已格虞庠之應靈華生體  
更申蜀學之休臣親遇泰寧預承昭假鳴鑿槐市觀光  
豈但於橋門檢玉岱宗望幸想深於闕里臣等無任

賀醫學芝草表

臣某等言 聚醫命教肇開黌舍之嚴愛物好生迺格  
芝房之瑞天其孚佑民用交欣中賀竊以軒皇之述方

書亶惟聖作成周之治疾癘實廣上恩世咸昧於淵源  
術乃淪於工技會逢熙盛參考古初增其官師訓道之  
負崇以經術義禮之學羣士慕嚮迪我德心協氣橫流  
產此神草玉蓋金莖之競秀羅紋紫點之相鮮對敷講  
肄之庭昭示睠懷之意恭惟皇帝陛下執慈為寶體仁  
如天常善救人益運道樞之妙博施濟衆共濟壽域之  
安煌煌三秀之英顯顯十全之應臣幸聯輔拂親覩休  
祥荷帝博臨豈比元封之賜與天相畢當符抱朴之書



欽定四庫全書

初寮集卷六

宋

王安中撰

碑文

定功繼伐碑

奉勅撰文御筆賜名

案資治通

鑑綱目宣和元年六月夏人來詔童貫罷兵分註云關右既困童貫諷夏人因遼進誓表及夏遣使來賀天寧節授以誓詔夏使辭不取強之持還及境棄之而去此碑所言款塞請命皆粉澤之詞蓋非當日之事實也

上帝眷命有宋既付中國垂裕于億萬世惟帝有訓自時與宅外暨海隅四夷百蠻咸俾臣屬惟我祖宗克對



大命德澤之所滲漉仁風之所流行無此疆爾界之異  
故冊書命節顯服威靈之封加于三代弗錄之邦元龜  
大貝南金象齒之貢來於九譯窮絕之域若乃錫土胙氏  
越在外藩世賴國恩以生息其黎民孫子厥有弗虔則六  
師之所必移九伐之所必誅蓋上帝之命則然其孰敢廢  
西夏自繼遷叛命盜據靈武至元昊僭竊踐有銀鹽甘沙  
之地因舊保障增建州邑稍寇取旁近部落附益其衆歷  
諒祚秉常三世自擅不討而青唐吐蕃河南諸羌錯居隴  
西湟中南安金城故地雖外示恭順而內懷顧望名相犄  
角而實為唇輔荒忽靡常數為邊患神宗皇帝天錫勇  
智高出百王之上創法立制內治既穆攷圖數貢乃始慨  
然有鞭笞四方之志顧茲西鄙逋誅積歲爰因神人之憤  
肆興師征於是擢王韶於踈逖曰韶汝嘗獻書請事河隴  
以制夏人今予付汝以將帥之任往惠汝言以底乃績聖  
略先定動無遺策一舉而城熙州再舉而拔河州遂拓洮  
岷別為一道邊堠益斥且扼青唐之吭斷夏人之臂矣秉



常甫立亟為分畫之請詭譎不忌時時小入盜邊隨擊  
隨卻元豐四年邊臣上言梁氏顓政國人携貳侮亡攻昧  
茲惟其時詔以五路兵進討李憲出熙河种諤出鄜延劉昌  
祚出涇原高遵裕出環慶王中正出河東會兵興靈共覆其  
巢居諸將戰比有功夏人疾傷者什七八餘衆跳遁明年大  
築橫山之要樓櫓相望淺攻耨耕賊不敢復留塞下其經  
理控馭之略甚遠且備元祐之初乾順紹封在廷倡言棄  
地乘障之臣希意和附卒以元豐所築葭蘆米脂浮圖安  
疆四寨遺賊至於熙河之女遮安遠一切廢罷而邊城  
隤九踰境晝不撤備賊知吾中國易以計動不自厭滿  
分畫之議無慮三四變哲宗皇帝親政之始深惟寧人  
有指疆土既底厥成而群謀弗戢感國玩寇聖孝感發  
當饋喟歎謂輔臣曰熙河分畫已再至而背約遷延宜增  
備力守勿復與議賊情惶怖請遂如約既詔不許因命  
薄伐將士賈勇思奮所向輒克河東復葭蘆環慶復安  
疆鄜延復米脂後進兵築南牟會為西安州幅負千里



東界麟府西抵熙蘭土壤衍沃物產饒阜故時山界聚  
落內屬者過半矣元符二年王瞻畫取青唐乃次策招  
納於是河南大首領果莊之子巴爾斯博恰舉四城來降  
瞻引兵渡河以夜半發徑取邈川夏人大懼失援謀襲  
我師統帥趨戰益急瞻遂提孤軍入青唐降偽主向於  
大定而初謀內搖外庸弗記然夏人已徜徉縮粟不得  
西結諸蕃勢危力竭更緣宓援求成於我中國之威茲  
大振矣皇帝嗣服永惟上帝祖宗畀付顧託之重在予

一人仰遵神考燕翼之謀哲廟繼述之孝大修政事嘉  
靖區宇天地並貺神祇安樂封畧之內冠帶之倫函蒙  
祉福東盡出日南極丹徼皆跂踵面內而北國寢衰初  
弗敢桀道德之威莫不震疊獨茲一隅遺孽未殄尚或  
繹騷上曰嘻惟予父予兄造攻自西絀誹排疑克就丕  
烈圖功攸畢予何敢怠其奮予武斷以必伐粵崇寧二  
年先於青唐王厚出河州破魯格特堡斬大首領額琳沁  
獲首千降戶五千高永年出蘭州開通湟路降二千合



兩道兵三萬衆傳湟州賊堅壁以待外救攻之三日不  
下乃別遣驍將選卒間道疾驅渡宗河毀水寨火浮梁  
以絕其援奮兵四面急擊拔之斬首二千降戶五萬築  
綏遠關臨宗寨進兵撫定河南部族十餘萬偽王子錫  
巴亥以其族降獨勝宗隘諸族未附亟討平之湟今曰樂  
州三年夏合熙河涇原秦鳳兵樂州分道三永年由右  
張誠由左厚統中軍直趨星將硤會于宗噶爾川偽王子  
錫魯蘇悉其精甲來拒諸將鏖戰自朝至晡士氣彌厲

金鼓之聲砰隱山谷賊棄仗走尾擊五十里斬首四千  
降戶十萬錫魯蘇妻回紇偽公主以其衆來歸且納隆  
持特城管鑰進據廊州廓遂城鄯善以為西寧州冬遣劉仲  
武潘逢擊河南諸羌之反側者斬首千餘誘偽王子趙懷  
德降獻於闕下詔授懷德以雄武之節封順義郡王四  
年夏錫魯蘇復結賊入寇圍宣威城遂犯廓州新邊為之  
搖諸將夾擊則引去追斬數千大觀初謀告土蕃藏怎  
巴特噶爾據錫桂城招結蕃族稍創文法立名號二年



詔發兵六萬討之仍分軍濟河為翼遂拔錫桂城以為積石軍藏怎巴特噶爾以其屬降移師收青藏川以為洮州大首領默錫勒羅密克率戶五萬來歸師踰青海至者節占城草頭回紇族數萬官其首豪通道于闐底貢寶玉而地闢青唐之外矣夏人自前犯會州為劉法所敗屠和爾提克泉略烏爾戩川乘冰堅踰河躡蹂四百里俘斬萬計餘皆麇鹿散不思自保至政和元年猶挾畫疆為請氣鉗議先形露虜喝邏騎越軼要衝輒自為塹畔既賜銀川石堡則益躑躅偃蹇不即馴弭四年始上誓表設詞譎謾報以優詔使人置於保安傳舍而去更入鈇略造為兵端六年誘蕃官趙懷明殺邊吏率衆而奔始命以諸道兵討之先是上嘗以禦賊形勝語諸將曰古郭隆地下瞰西涼清水河逼烏爾戩渡壓賊右廂城此則賊在吾股掌中於是法出樂州據古郭隆築震武軍仲武出會州據清水河築德威城賊悟來爭擊敗之禽其首領斬馘數千秋觀兵環慶招撫叛黨望



風來歸者相屬懷明內悔齟舌發疾半廢因遣姚古築鎮安城直補障塞達於廊延斬撓蕃賊首五千得鎧甲馬牛羊橐駝以百萬計七年賊入環慶城佛口谷偽號成德軍圍邊壘三十六陷濟義堡又攻破佛口并敗賊外援斬首三千生縛惡首李賞樵卜等千餘人乘勝分兵築熙河涇原河東城寨十數誘懷德弟尼瑪丹怎以歸賊猶數侵竝寨上震怒詔諸將以兵二十萬絕磧窮討前直蘭會築日木多泉偽號治安城直廊延築藏丹河偽號洪夏軍皆賊蹊所蔽而藏丹尤斗絕連歲不能取於是种師道統兵進攻以次斬首七千禽偽監軍以下首領千數遂築制戎城賊益感恚極而狂僥倖一戰莫少償所失亡則眎其下猶有辭宣和元年舉國來寇廊延陷鎮青堡涇原陷靖夏城進圍震武軍結河南諸蕃攻積石軍洮州上用不赦詔涇原合熙秦兵平克特口廊延西合環慶兵平齊吉克臺東合河東兵擣沁布班堆又分秦鳳河東兵擇利深入六路同日濟師賊乘



間再圍震武諸將自涇原晝夜倍道往賊出不意噓默  
褫氣遁不及顧遂焚聚落夷險隘斬首萬餘獲生口孳  
畜不可訾數乾順款塞請命辭意確至有詔班師凡平  
青唐吐蕃全國建州四軍一關一城六寨十堡十二降  
王子三部族二十萬俘斬四萬收復國地數千里築軍  
一城七寨五堡壘二十四破賊城八禽首領三千降部  
族二萬斬首五萬初乾順憑藉父祖餘資徂國弗誅乍  
叛乍臣靡有寧歲青唐既滅兵在其腋左支右潰不戰  
自弊土宇日狹又失金繒之賜皮毛糗糈久不自聊逮  
茲悔過上未欲以赫然一旦之怒鉏其垂盡僅存之種  
詔語中出歷數其罪而切責之仍戒以守今定界無所  
計議大哉王言非復向來姑息優容之文乾順聽命惟  
謹即日進誓天寧元正陪臣來朝惴惴不敢失館人膳  
夫毫髮意迄今三年乃手製御帳以獻因求賜監書欲  
以古今君臣大分自警其意蓋可知已於是群臣奏曰  
西鄙用兵垂二十年惟陛下神略誕施威懾德洽受俘



端闕慶捷紫宸駿功巍巍輝耀古昔願紀之金石訓諸  
無窮上以命臣某臣某竊伏聞之曰昊天所子為中國  
君天大奉之必將侈其土宇荒遠之裔順天者存違天  
者敗此理之常昔者朝鮮誘納漢人裂為四郡樓蘭遮  
留使者首傳北闕匈奴呼韓邪內附則擁護以安而北  
單于自絕沙漠竄亡之不暇突厥頡利弄兵渭上刑白  
馬盟便橋未幾為唐所敗脫身走保鐵山卒禽之漢唐  
且然况吾有宋之盛陛下神聖為天所子為無不成欲  
無不得天方授我不獨以此陛下兼覆無外特許乾順  
脩貢天地大德雖臣莫得而名若夫西戎即叙神考之  
功哲廟續之陛下成之宜有聲詩以揚烈光敢拜手稽  
首獻詞曰

宋承帝命光宅中宇蠻蜚夷戎悉臣悉主維我祖宗仁  
聖一心與帝分職靡不懌臨彫戈彤弓玉符金券孰為  
世守以封以建毋貳厥心覲享以時有弗來庭帝不汝  
私蠢茲西戎恃險用詐遁逃靡悔盜有靈夏自遷再傳



昊驕卒狂帝亟劓之使內自戕肆及秉常逋誅積世青  
唐連鄰陰為脅齒明明神考聖智自天閱書于匱亟行  
韶言曰汝徃哉先事河湟版圖六州扼賊喉吭乃築橫  
山障塞千里聲震興靈屋瓦飛墜元祐之初棄我翰藩  
賊張婪酣滋魚盈厭哲廟親政爰始繼伐日寧人指予  
敢不力師直而義遂復侵疆天都南牟樓櫓相望瞻既  
入湟功潰于成天其或者以授于今皇帝嗣服事遵熙  
豐豈載揚我武聿圖寧功分命將臣訖此外畧使輶涖止  
以究以度臣厚偕止于湟合兵羈其名王翦其屬城過  
師青海冠帶回紇通道于闐底貢方物夏人內憂倔強  
自誑行人失辭置詔而徃鼠竊狗偷不耻敗奔誘納叛  
亡實開兵端問悉其有以伺吾怠左逐右入遂無寧歲  
帝赫斯怒底天之罰百萬齊驅勢若摧拉有執其豪有  
馘其醜有推其鋒有躡其走言言其高我有城阻翳翳  
其荒爾無室處賊窮呼天丐此項領猶懼不貸遑敢它  
請天惟畀矜聽其內附汝以誓來予則赦汝賊捧詔泣





原件短缺

缺11~14



申以誓言貢篚在廷不懈益虔皇帝曰嘻上帝是荷伐  
叛三世告成自我自彼河隴全為王民夏人所餘僅在  
彈丸皇帝曰嘻內外治異不有師征外鮮克畏畏而舍  
之懷徠孔易天生五材兵不可廢昔在藝祖首春踐阼  
夏取單路冬拔揚楚瞻落四夷業垂萬年茲予守邦敢  
懷宴柳柳雲泉小寺口殿記

命必取有順

而縵

中未載

辛卯七月

夏人其益自

見房西今不復

燕居記

戒汝弱可兼予恩不再君臣稽首賴天子明西戎即叙

孝極廣聲神考之神哲廟之聖天子之功上帝之命群  
臣稽首聖功巍巍威震朔南敢不來歸來歸不遲畢朝  
明堂臣作頌詩以訓萬方

記

清州靈津廟記

奉勅為河清重修代  
轉運使沈純誠作

天右序有宋正域四方融結複重表裏險壯乃眷北顧  
造設形勝惟河海統會川瀆大無與侔宜為中國襟帶  
抱負之勢上帝有命百神率職相與回河斗折下趨瀛



申以誓言貢篚在廷不懈益虔皇帝曰嘻上帝是荷伐  
叛三世告成自我自彼河隴全為王民夏人所餘僅在  
彈丸皇帝曰嘻內外治異不有師征外鮮克畏畏而舍  
之懷徠孔易天生五材兵不可廢昔在藝祖首春踐阼  
夏取澤潞冬拔揚楚膽落四夷業垂萬年茲予守邦敢  
懷宴安天方授我溥天率土負固必誅擅命必取有順  
而嚮不失汝所德刑並用孰敢予侮洛汝夏人其益自  
戒汝弱可兼予恩不再群臣稽首賴天子明西戎即叙  
孝極廣聲神考之神哲廟之聖天子之功上帝之命群  
臣稽首聖功巍巍威震朔南敢不來歸來歸不遲畢朝  
明堂臣作頌詩以訓萬方

記

清州靈津廟記

奉勅為河清重修代  
轉運使沈純誠作

天右序有宋正域四方融結複重表裏險壯乃眷北顧  
造設形勝惟河海統會川瀆大無與侔宜為中國襟帶  
抱負之勢上帝有命百神率職相與回河斗折下趨瀛



霸匯于盧臺之野紆餘平行限絕虧䟽包有藩垣障塞  
之地屬之於海濤波之滲漉潮汐之吐吞則又益于陂  
塘東西際連是為天塹綿亘千里無復越軼之患氣象  
雄奧扶輿磅礴足恢朝廷道德安強之威大觀初元天  
地之貺應期紹至川珍嶽貢與夫草木羽毛之瑞杳然  
前陳九月河水時至自乾寧而上八百里清湛一色可  
燭鬚眉日晶月輝涵泳空洞龜游魚躍散布深湫蓋七  
晝夜而後如初水衡上聞宰相率百官扣閣頓首賀皇  
帝曰噫上帝眷佑予敢不欽其以乾寧為清州制下瀕  
河耄倪手舞心拜驩聲動天帝益順賚乃奔走海若俾  
出雲輿雨無或失時節縮河流避民黍禾歲中再穫用  
贍給于公私號新政和既大為之防以節止塘水役不  
告病隱然時成而榮光發祥又在于扶蘇之口如鑑如  
練同向所見跨地加遠而積日倍之于時東南海水亦  
復澄紺明澈効祉相望披圖按牒千百載不一睹而同  
時並貺天意昭晰由三五以來未之有也皇帝方寅恭



謙虛推報于上下神祇咸秩無文以答殊祉故于巨流之所會歸靈跡之所顯暴尤以加意異時獨流西崖有顯靈順應神妃祠成以居人之私力簡陋窘偏不稱象服冊號所以崇極之制皇帝高拱巖廊之上千萬里之遠靡有弗照睿旨中出俾本部漕臣撤而新之專實始商度請少徙百餘步稍附益隄而創營新宮圖上而專罷申命臣幾董領鳩工棧木而幾移帥常山臣純誠適蒙上恩擢使專被中詔崇飭厥事築以元年之秋裁以

二年之春迄某月某日甲子乃成題以前所賜名曰靈津之廟金帛取於經用之餘卒徒料於役使之羨工之積三萬四千有奇材木甄甃未陶之坏丹堊鐵石絹葦紵漆之物條計枚數銖稱尺量無慮百萬而郡邑近民之有司初不與知凡廟之屋為間者百六扉前啟五殿中峙齋廬嚴靚環廡脩殖甍峯焜耀神其來舍考室之日臣純誠盛服即事鄴幣明蠲牲酒芬烈祝史正辭以皇帝報貺欽崇之意告于有神空馭克廷煙霏徘徊河



聲恬徐班爛蝓蜿之物踊躍出聽海之神山貝闕延吐  
雲景光氣以相映發邊人縱觀並受福禧思德務報咸  
致萬壽無疆之祝而一水之外黎民赤子悵慕跂立至  
於齋嗟涕洟大哉有宋之德所及遠矣臣純誠材下幸  
備乏使嘗請記事之成鋪張闋休而制旨因以命臣若  
夫營作之本末前已槩見臣純誠謹按清之建壘其來  
久遠天將有興周世宗頗開拓土宇為吾聖代驅除顯  
德中收復關南自浮陽御龍舟順流而北太祖皇帝神  
武英發盡護水陸之師所向輒下遂平三關明年受命  
以有天下惟此始征之地實基帝業太宗皇帝睿謨經  
遠因縣置軍以固疆圉聖聖相授與天同仁並邊之民  
斑白野處不聞犬吠之警是宜河宗谷王出見上瑞以  
為太平之符詩曰薄言震之莫不震疊懷柔百神及河  
喬嶽又曰允猶翕河敷天之下哀時之對時周之命古  
之盛王制法立政既足以震動萬邦則神明顧懷雖河  
之善溢難制且使柔順聽命至於信能翕河則哀天下



之神而禮之以永厥命二篇之詩蓋相後先恭惟皇帝  
陛下躬有聖德天錫獨智自初臨御深惟神宗皇帝立  
經紀之志紹修先烈小大悉備天下復見熙寧元豐之  
盛自開洮隴奄有積石故地禹貢所書導河發源漢唐  
之所未覩而踰度其處曰崑崙紫山云者由首及尾悉  
入封畧之內歷星柳與井至於昴畢之分朝宗於海初  
無決溢橫潰之虞迅流巨防自成長利則所以震疊懷  
柔者於此可見乃若澄波之瑞固已升訶泰壇歸美宗  
廟示不專有而靈津之祠僻在徼戍親詔繕治務極隆  
顯則裒神而對之者殆無不及昔我章聖皇帝既奉真  
符陟岱宗天步安夷珍物紛委於是河清于陝郊者再  
其後祀后土於汾陰竝配太祖太宗還駕嵩洛親謁寢  
兆以至迎仙宗於真游款道祖於亳社大曲畢舉垂光  
冊書帝陛下荐膺丕况同符真祖裒神對越協于周頌  
意者遠覽詩人沛膏澤之博近法祖宗廣符瑞之富舒  
德發號勒功告成以闡萬世無窮之休三神百靈與夫



九州四海之衆猶冀旦暮遇也臣純誠敢緣廟事并著之臣謹記

河間詔書記

臣某崇寧乙酉春蒙恩擢帥高陽親承德音申飭疆政臣嘗從事于瀛其後三奉使指周旋北道寅緣官之攝領鎮定形勢險易備豫後先舊頗習知顧臣非其人也矧三關被邊最河朔勁兵處猥見推擇尤懼無以仰副聖訓惟是承平日久中外晏夷祖宗在天臨蒞大信借

彼蠢爾誰敢動搖邊臣時裁取充位而已雖文墨議論不忘搶攘徒淹歲時無甚赫赫聖上躬按吏瑣錄臣勤竭鋪舒睿藻洒落宸翰躡陞扈從再屬閫寄臣竊自念才分迂淺而寵任超踰是速于咎乃抗章祈免手批腴渥弗容懇避皇恐祇命具如上旨臣謹按高陽置帥歲在慶曆戊子距今六十年矣親詔再留蓋自臣始臣考之前載爾書增秩言或予代縱筆大字未厭民觀伏惟皇帝陛下道心精微聖學高妙形於聲畫神動天隨昭



回之光乃賁鄙陋臣固不足刻畫大巧意者寶訓所在  
百靈來拱物無疵癘而兵寢刑措因刊于石以侈非常  
之榮亦庶幾並邊之民與受其祉若夫忠義稱報則子  
孫以之豈特捐臣之軀也哉臣不勝昧死謹記

博州勸農記

代

上嗣服十有二載天人同和風雨順序野蠶穠麥之瑞  
史不絕書三農滌場百禮既洽冬十有二月申考四時  
之政以興嗣歲乃親御翰墨詔天下監司守令時節郊

野勸相農事明年春土膏既發自河之北南逾京輔甘  
澤滂注者三尺訶謳布野耒耜畢出吏久不踐阡陌懷  
詔徨顧方問儀于耆宿而本道安撫使北京留守已涓  
日同部使者屬民於近畿植勸農使旗於田中讀詔旗  
下延禮其父老而教戒其子弟來聽者蓋數十萬人歡  
聲四傳列城聳動部使者亟以其事曉所隸郡會博關  
守臣某實領郡務遂以三月甲子率官吏至郡之西二  
十里崔度傳舍合聊城堂邑旁近鄉民設庭下之位措



笏出詔書讀示并道上惻怛愛民敦本之實德因搗其  
高年受以善本扶藜垂白既醉以酒相與羅拜呼舞請  
祝億萬歲壽以報和氣熏浹風日妍麗林霏草露皆有  
欣榮之色惟是天語諄複易感而難盡必得老於宦學  
信及閭里者日相講誦告語躬先唱導表率則有百倍  
於吏之力於是又即南城致仕宣德郎孟介之廬就致  
上之德意退則以詔刊石且屬臣某記其下臣竊惟  
國之大本在民民之所寶惟穀二帝三皇之盛莫不務

此稷官之建民時之授祈報之禮補助之政具載方冊  
推而行之每在平世若昔藝祖配天立極由建隆至乾  
德再以尺一之詔敦勉農功用垂法于後聖太宗既耕  
帝籍爰命州縣立農師以教種藝章聖在御乃始分道  
置使賜以農田勅令俾知所承祥符中又因呂夷簡有  
請悉蠲農器之稅仁廟聖性恭儉惟稼穡是好明道再  
籍弁冕舉趾進至十有二跬三公已下盡墮乃止迨我  
神考稽古創法肇開千畝於國之南而又置常平之官



定蠲後之令修水土正經界所以惠遺天下德至渥也  
上遵制揚功悉復熙寧元豐之舊聖孝感格既屢有年  
而親詔丁寧上以無忘列聖之德下欲元元之衆臻于  
富壽當是之時豳風駟頌與漢文景區區一切之事蓋  
不足道惟臣某之先伯祖文忠公齊嘗參仁廟政事某  
父延慶被遇神考入直禁林出典方面臣某亦頗習知  
朝廷舊典宜能雍容精白推廣聖志而布之于民惟博  
於禹貢為兗州之野土地沃衍並宜五穀之產織文  
絲紵饒於四方聖代承平民力一無所用家有父祖相  
授之業野無尺寸不毛之田顧今乃與率土之濱亟蒙  
詔恩自邇以眎遠凡播告之所及以求稱上旨者宜何  
如耶深耕易耨奄觀銍艾以供有司之賦以足仰事俯  
育之計慈順輯睦日用飲食相率無犯上之教令則家  
給而國用充刑措而天下服詩不云乎帝命率育無此  
疆爾界陳常于時夏臣愚所幸如是而已豈特為博人  
誦哉臣某謹記



北京深州安平縣真武靈應真君廟碑記

道京師而北三萬家之邑今獨深之安平而地則定州也異時建國以其號名之美非信近不侯非親子弟不王故鄂千秋定蕭何相國之功司馬孚有純臣高士之操始得受封其不輕畀付人如此宋有天命累聖仁厚之度不欲多官府以擾齊民元豐蠲役之典世守而不敢亂天下之郡縣有定數吏有定員日以休息無事終不以昔侯王今令宰輒改置也頃蓋欲以安平為郡又欲徙深而治此者亦嘗相陰陽之抱負審絡脉之紆蹙其西不能百里即北嶽常山之麓坡陀湧沒氣象騰擲而前如鷹擊鵠起既獲而徐落河來萬里塹其東南故奧潤衍沃薶麥繭絲之饒足贍四方之求野有樓居行有衢飲虛市之繁如通都豪右之養如貴室攬櫨丹堊之飾蕩搖心目訶謳踔躡之戲闐噎閭巷則雖郡不能比也夫惟邑之勝宜有喜事者崇成佛祠神居以為城郭壯麗之觀歲時解禱庇其耄倪於是真武靈應真



君祠屋老而庠上雨旁風神逝莫留福不時降故絳守  
中大夫王侯之族子鄉貢進士掇顧瞻惴惴欲撤而新  
之以告諸鄉人之好善者捷行義自為人信一舉義而  
資用足知縣事安陽鞏侯瑗與其屬聞而勸相之迺以  
大觀庚寅八月丙戌始事迄於政和辛卯三月癸亥而  
成靈扉前啟三殿鼎峙然其中者以奉真君東則廟碑  
之所庥西則為紋甃方池以俟神物之遊又為十二元  
神像侍兩廡是皆前所未有者廟成之日嘉薦始升雲

景徘徊風馬來下惚恍祕怪蛇蟲蛇蟠之物出慕蕭薌  
隕祉告休瘡癘不作使君壽考民用飲食而捷之意更  
欲論著本末圖厥永久惟邑童子暗記默識能知郵子  
藉稻之說今乃更從旁近求文不亦左乎然某宦游經  
過偕諸人至祠下屢矣邑又近吾州是可不辭謹按道  
家者說神乃北方之將玉帝之佐嘗降於龍漢之年披  
髮按劍足躡龜蛇世又云即莊周所謂禺強得之以立  
北極者昔人說周之書固曰水神初未經見夫道至於



神神至于帝則天地之運禍福之應且將詔之其精明超  
忽與維斗日月並為長久而陟降監觀出入於人間者  
理所宜有周之言借曰寓而龍漢之記渠敢不信謹拜  
稽首作銘曰帝乘倒景遊八方衆真衛翊驂龍翔日君  
月妃儼侍旁抽闕闔闔趾扶桑旬始滅跡撓槍蔽三山  
出雲蔚相望九瀛如杯波不揚停軻弭節一笑相忽然  
腥風觸天香却視濁世流血滂帝頽以怒威煌煌人鬼  
莫辨難則殃北方神君握天綱髮垂腰環鬚磔張寒龜  
縮殼蛇束僵吸呼雷電下取將中單金甲纁佩裳月以  
三七行無鄉一瞬千載空冥茫我思築祠候神光吹笙  
參差鼓節鏜雲物晝晦神相羊我民奠居福穰穰詩  
送迎神勿忘

瀛州經武堂記

崇寧四年春詔以集賢殿修撰張公帥高陽既見吏士  
問民所便及邊政後先已即周覽官寺府庫營屯門渠  
凡帥事之所關逮者悉領略之而致思焉補苴罅漏趣



成條維綱舉目張參差適序于是可以有營矣乃論于朝高陽寔都總管府簡練訓閱之無所軍政取具臨時士益懈不虔請度僧牒入其進以給營繕此經武堂之所從作也府堂有是名舊矣圯徙無常今丞相來帥時嘗建于甲仗庫軍資庫之間使士卒受所養知所用親以大筆書其顏堂雖中壞比榜巋然猶存公既獲請即因故基而崇侈其規稱書法之偉若將使後來不可加者經紀儲度得成屋于胸中乃以六年五月始事為堂七

楹十二架左右置挾因二庫為東西序南直射棚作門以便出入北盡城築亭䟽池種所宜草木以為淤集棲息之所堂之中極空地丈衡從俱倍之廣庭脩廡顯豁嚴靚九月工告成力出于羨卒費取于好賜高陽之民纔聞斤斧剝啄之聲而堂既巍然矣是月某日合樂大饗落之旗旒植植隼龜飛動鉦鼓轟作聲聞郊坰賓介獻歌工瞽執技將吏裨校以弓矢飲權竒騰蹙之騎駢白驪駱色奪綺繡耆老稚孺旁州喜事之人觀者如雲



適秋閱諸將士選卒馳射擊刺無虛日而時聘之使踵武故事過關習射張侯館次及是皆屬于堂惟高陽道有郡十一負海帶河陂塘沮澤之限號為天塹自景德罷兵累聖天地之度一視同仁橐戟鞘劍順拊其隣而吾民雍容飲食以樂無事生齒之衆不啻百萬籍于兵聯于保與丁可任者四五車輦六畜多可賦無用則已如有所用沛乎其易易矣然由慶厯置帥甲子適一周文恬武嬉永無譎張顧一堂幾閱人獨丞相增新于前而公為起廢于後天下之能立事者果可人人而求之歟先是公簽書瀛州判官自任州務詳盡敏齊其後刺部河北屢過之及今出帥邦人既榮公之來又習公之明毅閎朗公亦安其風俗之舊上下相與以無所苟繕城守飭櫓具師律馬政日往來于懷囊篋細碎無遺漏北使過城下見其完壯矍然曰遽如許復有得公治聲者曰嘗為轉運官非耶上乃親御翰墨寵之曰學博行醇機深慮遠訓齊師旅有聞無聲濬治城隍克臻深



固綿綿翼翼綏靖北邊且進顯謨閣待制而久任之則公之所立豈特見于此堂也哉顧不曰無競維人四方其訓之夫天下之事果不難立而形勢憑倚之厚概不必論至于為者成欲者得則用人莫彊焉故文武治外之效與宣王所以復古徒得南仲吉甫張仲方叔叶意嚮事之助後世無如召公之臣則幾何不大壞恭惟主上親拔公于卿列畀付方面不吝名寵超寘法從蓋與慨然遠想廉頗李牧之為人近不自知其臣者異矣而

公之報稱又每卓偉宏遠如上所指盡用極報有加而無已則夫為者成欲者得將必有大于是也故于堂成併記公際遇之盛蓋有侯云大觀元年三月十五將仕郎充高陽關路安撫都總管司管勾機宜文字王某記

河間旌麾園記

清河公既作經武堂語其屬曰君子之教必因人之所甚欲而寓所不欲焉飲酒而習射故觸捷不駭從禽而習戰故誓禁不拂凡吾堂之作固不曰資燕喜備游觀



而盛服以臨吏士令行如霜不赦而寂是誰與歌舞之  
哉吾將使人勸趨樂赴聲氣愉怡而視聽不聳則吾堂  
之事沛乎其易易矣於是即堂背畫城築亭以為游集  
棲息之所因故水別穿二方池為橋東西跨以達於亭  
既又仆除頽垣廢堦則高陽臺見於左經武舊堂與水  
間一亭見於右軒露映發如獻如酢公喜曰吾得之矣  
乃鐫補凸凹䟽塞壅豁指布臺榭之所置蒔花種木之  
所宜口講手畫皆就條理而觀者恍然如記昔游如閱  
竒畫遂欲眩丹碧而擷芳菲也既圖具邦人有進者曰  
公有德於我舊矣自從事以至為帥不苟於我有邦規  
模設張惟久遠是務新堂之作無須於我增勝槩於河  
山保惠無虞而瀉澤荒萊復化為麗絕曲折之游歲時  
樂胥士女龢會自今茲無窮休且使有事於經武者無  
倦公之所寓深矣願無忘公之德某輒推是意而命諸  
名民屬於賢淵珠山王於魯季子審其數思舊堂宜名  
曰來賢堂慈惠之施我則有本奚取於水河潤九里水



間亭宜曰流潤亭臨人不愧使君壽考高明之崇納此  
日月臺宜曰存景臺桃李成蹊松栢後凋種木者誰有  
斐君子四時門亭宜曰種德亭杖屨逶迤民樂豈弟其  
趣超然一邱一壑中休亭宜曰成趣亭雨露之播有暎  
其華健步遠移從衆好耳新堂西亭宜曰繁華亭煖然  
似春吾道不糝草木欣榮孰披拂是新堂東亭宜曰惠  
風亭從公于堂知樂其樂優哉游哉處女媯虎負城亭  
宜曰和樂亭雖然天下之事一廢一興默自有數而瀛

之有此適自公始固將以榮公之來故又取杜子美十  
年出幕府自可持旌麾語合而名之曰旌麾園而子城  
北樓門適園門也邦人更以是說之夫物之不治每出  
於樂因循而事湏臾樂因循故堂上有不糞者而事湏  
臾者顧肯執逆旅難俟之木以冀園林之成於數十年  
後昔秦襄公始命有園囿之樂詩則美之曰游于北園  
四牡既閑而召伯所舍之木人相與囑勿剪勿伐公方  
收拾官棄餘成就壯觀以寓政事而訪耆舊以地所宜



變氣布種因以習知神農之學勸課其民則與夫樂因循而事湏臾者豈可同日語哉吾見其駟馭甘棠之美將作于今而傳于後也庶幾名字附以不朽焉

相州右獄壁記

政和二年詔書深惟元豐董正治官之義稽古六職分建曹掾眎地輕重為多寡於是相具曹而不備掾相有右獄實前司戶叅軍所治而獄在州院久廢明年三月建安黃敷書始至喟然曰曹事惟爾長予將雍容諷議以俟助爾其敢不專予狴獄之治乃撤舊增庠苴漏達翳以具涼燠之室權衡脰械如令不失銖兩調護湯沐飯哺以時仁術既施更復繕完吏舍帑廩垣翰閤籥悉就方畧它日吏朱印章合牘背遽視篆文與事大不類請於郡求上尚書更鑄印朝論是之獄有印自君始君又欲論次釐改本末因著前人名氏用意甚美且囑余記之余惟若昔天下之治官無大小惟上所建立罔不丕享用克底於成今主上超然遠覽純法三代之盛圖



惟四海之大肇嚴本統衆建多士宜我有官君子不命其承况命之諄諄然哉惟相地大民衆有商賈甲之故都曹魏高之流風既已蕩然無餘聖朝重熙人知率德而郡網嚴密多出忠獻魏國韓公之舊今太守公實嗣世德清通簡要能盡下所長顧官於是邦者初無甚難不可任之責惟塵身從事皆能如君則進有享上之美退無空餐之媿不亦休乎予故喜道其事以為大不能為小不屑為者之戒因以自警云黃君元度其先大夫將使指歷郡守以才力聞晚遂家於相君姿儀頎整初筮仕丞相見而異之自河間刑掾改此蓋堂選也政和四年五月二十日北嶽王某記



欽定四庫全書

初寮集卷七

書

上姚伯壽書

宋 王安中 撰

某讀杜牧之文有曰魏於山東最重於河南亦最重蓋嘗善其意而隘其言矣唐都關中河朔失馭牧特見魏之能遶趙既不能越魏以取趙又不能越趙以取燕則魏重於山東見黎陽之扼白馬新鄉之逼盟津則知魏



重於河南二者豈天下之常勢者哉所謂常勢者某請言之夫王者之所以網維天下者凡形勝之國必臨之以非常之材衆大之都必表之以萬夫之望惟其道德夙聞而位貌隆顯威信懽布而遠近服從則尊嚴足以輔河山之雄安靜足以挈封圻之大故畢公之勤亮四世則命以保釐東郊申伯之德聞四國則命以式是南邦此所以父師有無窮之間而戎翰為周邦之喜者也魏於河漳之間固一都會自廣德初寵其軍為天雄其後藩將邊節牙旅議師都府迭為興廢官廨幾易榜題聖宋造邦祖宗以神武統一海內建隆開寶之間猶假勳戚領節度置守之制既定雖雜用文武然皆當時名臣興國撫師咸平遏敵戎路順動再此駐蹕迄於慶歷始下建都之詔而居留之任每輟台衮之貴蓋京師為諸夏之首而此其屏毗朔道連四鎮之勢而此其根本則魏之為重豈止遮趙阻河如杜牧之所言而已哉日者尸正虛席天子屢顧廷臣求可付者獨得公於八座



之近寵章腆渥申之以任同舊弼之語入辭及殿陛玉色喜甚既新延康之名首以命公於是滿朝榮歎相顧而言曰美哉斯行伏惟執事博辯之學瑰偉之文為一世之所宗讜正之論忠諒之節為人主之所信勤施于中外名震于夷狄徇翔禁路見謂者俊今乃眎猶股肱之列昇以符鑰之寄報政談笑發軔機衡將自北始矣其得以不肖之軀託在抱關之隸於是學問名字初不能少自著見于世而依詩書以便慵寓翰墨以神拙俛眉承睫以偷升斗之得者正有賴於朝夕之庇又其來魏之久終更且近因敢綴緝舊聞以誦之于贊見之際夫爭名者於朝爭利者於市天下之士聚於中朝而求愷悌有德者歸之執事閱人於王國之富而士丐餘論以卓然有聲於時者非一也如某者尚何觀焉孟子曰予不屑之教誨也者亦教誨之而已矣區區所覩有在於是惟少垂意焉幸甚

上韓侍郎書



某嘗觀太平極治之時和順英特之氣流行于天地之間日乘之則再中月際之則重光星從之則循軌雲觸之則郁郁紛紛露值之則如脂如飴湧於池為醴泉韞於山為寶玉蒸於山為芝草澄於河為榮光異畝者頽同旁枝者上合華者駢房秀者并岐觚者一角天真僊聖覽焉而徘徊不知人間世之殊羽鶴威鳳樂焉而翺集不知方內遊之近蓋時君世主躬盛德以動化天下而衆賢修輔多士來寧神祇顧懷夷夏康謚禮行而民阜樂備而物蕃則天地薦休動植效祥固有自然而然也天地固神矣彼有生者或無知有智者或無義亦且發越自異以著見於有道之世鋪張於紫壇清廟之詩啟迪以泰山梁父之事則靈於萬物而有知學於千古而有義以道理為質幹以文辭為藻色者獨不思激厲縱臾以求達於旦暮之遇歟顧今天下雖不乏士而泯泯嘿嘿不亦幾於自薄也哉橫目而戴髮圓冠而方屨初不見所異士亦何自以出夫睚上之鼎巫錦識之雍時



之麟終軍對之彼瑞物者猶有待也况士之與人同耶  
某之椎陋尤無以異於人者惟是承學之舊欲出而少  
試有年矣幸今朝廷文物之盛又將時巡都邑奉符行  
事隆儒籲俊刺經攷古以成一代之制中夜自悼曾不  
得少奏薄技於諸生之列乃將從俗吏以問薄領之要  
師農圃以就耘耔之業心怍怍焉蓋不能不屑也四顧  
而望助雖有良朋不過相况以永嘆而已伏惟閣下以  
材德位禁從以忠厚膺主眷故家霖雨之澤行於施四  
海而仁術惠政素渥於中山之人如某者言氣俗則河  
山相望揆名第則世德所就必有所試舍門下則曷歸  
乎昔漢王褒為益州刺史令州人王褒作中和宣布詩  
以頌德而何武等哥之上聞即奏褒有軼材詔褒為聖  
主得賢臣頌而何武為楚內史厚兩龔在沛郡厚兩  
唐及為公卿薦之朝遂顯於世而世以此多武某雖不  
足望古人而閣下德義閎達豈褒武輩所敢跂萬一儻  
慨然興舊邦人物之念則不識獲預吹噓之末否乎間



不可失伏惟少賜垂意使參諸草木羽毛之類有見於  
太平極治之世則賡宣布之詩裁得賢之頌猶可為閣  
下勉焉或不至於辱也干冒威重下情震恐之至

回謝真定府劉延康書

光膺明命榮領要藩涓剛辰以布德威開幕府以延吏  
士上行北顧外控遠夷伏惟某官卓爾宏才赫然偉望  
頃鎮臨於浙部制殘寇之遊魂既參佐於戎昭歸新疆  
於輿地勲名鮮儼眷任愈隆說禮樂而敷詩書夙推儒  
雅聽鼓鼙則思將帥載懋賢勞果膺授律之求暫倚殿  
邦之重佇當柄用以協師虞愧遣問之莫先辱緘滕之  
見及維深感佩曷既叙言

回謝知太原府宣撫張延康書

膚公式奏異賞遙頒超崇祕殿之名增重外圍之寄邇  
遐蒙賴夷虜畏懷竊惟慶慰恭惟某官望實凜然聲名  
藉甚兼弱攻昧威畧遠邇於二垂建候行師惠術溥周  
於千里羊祜專修於德信欲穀舊敷於詩書拜而設壇



初隆韓信之禮跪以推轂今用馮唐之言七畧橫施兩  
州先闢爰興百堵亟就六城盟府策非常之勲論恩示  
特達之眷永清四海方載懋於顯庸為憲萬邦佇入陪  
於大政辱緘滕之俯及愧馳慶之莫先感忤兼深慰快  
罔喻

與鄉師書

設旄建旆以寄師屯上冢過家每懷鄉路茲解龍荒之  
戍來尋馬鬣之封三釜洎親痛初心之永已萬牛回首

認喬木之空存蒼顏鑑水以知衰鷲老塞塗而出涕恭  
桑與梓敢愆邑子之儀兩公及私輒載邦人之頌恭惟  
某官沈幾先物善政得民惠術再施溢兩河而蒙潤威  
名四達罄大漠以歸心已恢尊俎之籌將促廟堂之拜  
晤言可卜夙願惟深第弛役於幹方實在行而俟命茲  
豈春容之際矧加疲病之侵既望絕於門闈獨心馳於  
麾榮雅蒙照燭必賜寬矜

與牧馬王提舉謝書

以下代河  
北吳提刑



某啟比者叩命中宸按刑朔部入辭軒陛自天親奉於  
恩言出次封圻揆日甫交於事任幸聯使指預偃德風  
伏惟某官識度靖深器能踈亮秀出公臺之冑蔚為邦  
國之珍早被簡求存膺寄屬行水無事屢聞增秩之榮  
思馬斯才共睹赴功之敏別需異數遂列要塗某猥竊  
憲權坐虞官謗清風可挹已瞻承教之期餘潤所資尤  
在即工之始詠言之切敷述奚殫

回開德守書

某啟比者滿去鄉邦來趨天闕河圖進職恩換三州旬  
服承流任叨四輔將徃循於高躅竊傾跂於下風伏惟  
某官德器清深材資卓越早踐揚於膺仕素藹著於休  
聲報政近藩方聽歌襦之美登賢要地行持從素之榮  
曾是迂踈預霑光潤晞驥者亦驥何敢並驅執柯而伐  
柯但當取則尚須幸見併款緒言

回開德倅書

某啟比者代還鄉郡進被命書聯內閣之榮名假輔藩



之重寄存叨寵渥深媿超踰永言慕誼之深乃有親仁之幸伏惟其官德猷早著才望素隆所至有稱方共觀於游刃無施不可茲暫屈於題輿行對異恩遂躋清貫惟是承顏之近儻蒙畫諾之閑修問未遑既書先及顧莫殫於感臆當併叙於晤言

除左丞送宰執免書

恭承中詔俾陟左綱聞命若驚撫躬罔措竊以文昌之司喉舌實參總於萬幾輔臣之猶股肱豈相須於一德

授弗以次官惟其人儻無已試之功曷補頻虛之位伏念某器未堪於任大智不足以知幾會聖旦之親逢廁政途而登用展四體而舊職是率尚懷不給之憂釐百工而庶績其熙詎稱疇咨之舉矧列具瞻之地敢饗叙進之圖茲游布於忱辭冀遂頌於俞旨伏望其官亮天畫道為國擇賢矜夫易竭之才格以至公之議入告於后宜遷令之非難退省其私或丐身之有漸豈特安愚不肖之分抑亦愜士大夫之言



送中書侍郎復聞書

顯頌中詔進貳西臺政本增隆永迪萬邦之人巖瞻彌  
俊共榮千載之期伏惟某官學造精微器函宏大夙以  
經綸之業徧躋華近之聯委戴胄於左網殆無其輩任  
元超於右省豈藉多人萬頃彌直之謨允洽登庸之望  
宜趣承於眷渥顧奚俟於撝謙欣聞輿議之同祇愧函  
封之辱

回李右丞復聞書

顯頌詔綽入與政機盛德所臨朝有得賢之美羣情昏  
慶士知稽古之榮伏惟某官奧學造微懿猷經遠英詞  
健筆對為邦國之華雅量宏謨凜有河山之氣以親承  
於密旨果進陟於近司式膺不次之恩益播無窮之聞  
淵衷簡在方茲圖任之隆海宇具瞻共許贊襄之效宜  
趣祇於休命用仰副於虛懷

回謝時宰免書

寵答元勳誕敷玉冊左棘進三孤之位泰階開上相之



符國勢增隆民言膏穆恭惟某官忠貫金石智先著龜  
學窮妙道之原業備真儒之效粵繇帝賚登秉國鈞秩  
聖人之大猷以陳謨監先王之成憲而納誨邦治時定  
若泰山而四維人心式訛回狂瀾於既倒亶亶嚮假樂  
太平之象欣欣陳豐年高廩之訶宅百揆而亮采惠疇  
宜陟佐王之任弼一人而貳公洪化實先論道之求彌  
深作礪之咨奚俟循墻之遐覲趣承於休渥用仰副於  
虛懷

除尚書右丞與宰執親王免書

恭承詔旨俾貳政機雖遜牘之游陳慮俞音之猶閔竊  
以左右中臺之務維網萬化之原必忠言嘉謨足以副  
虛席之求則同寅協恭乃可贊垂裳之治度德以授惟  
帝其難伏念某智昧適時學非貫道偶天光之臨照獲  
蟬蛻於埃塵荷橐聯榮實先諸彥玉堂通直坐閱三霜  
慚無潤色之工第竭鋪張之願顧罷精於翰墨久已支  
離使備數於廟堂終虞隕越伏望某官燭其危懇參以



庶言百僚師師方迪交修之助九官濟濟豈無弼直之  
圖特於論道之餘啟乃觀能之要異田淵聽追寢誤恩  
庶逃累國之尤實被惠疇之賜謹具狀陳免

謝宰執書

往燕  
山日

入備網維莫贊舞干之化出當屏翰忽叨授節之榮荷  
睿渥之便蕃撫懦衷而震惕竊以設旄建旆南仲所以  
城朔方乘馬路車韓侯以所受北國矧全燕之奧壤實  
中夏之故封保大定功誕布惠綏之術折衝禦侮益宣

道德之威宜得宏才往分重寄伏念某學不足以窮奧  
智不足以識微自參丞弼之聯居積歲時之久聖神繼  
志獨觀萬化之原輔相協謀決勝千里之外曾乏壯猷  
之助幸觀偉績之成敢意簡求俾當鎮撫此蓋伏遇某  
官棟梁帝室冠冕儒林建不拔之基既懋經邦之業當  
非常之事亟收闢國之勲遂使懦庸猥蒙臨遣奉中宸  
之籌畫已懷弗識之憂備上將之威儀終負逾涯之愧  
第布宣於皇澤期遂復於民常上馬據鞍自歎伏波之



老輕裘緩帶但追羊祐之風

送宰執謝書

其啟伏蒙聖恩除授尚書左丞者入叅大政初徹底績之勞進陟左綱載玷出綸之渥靡遂固辭之請彌增非據之慚竊以文昌萬務之原有嚴管轄天子四隣之助允類股肱矧位冠於疑丞實任頡於樞憲若時式序宣日次遷惟稱塞之尤難在敷求之宜謹伏念某學瓠落而甚樸識蹇淺而非通蚤被眷知越陪國論陳謨每下已深浮食之虞玩日既多方俟曠官之黜敢期隆眷更誤褒陞遜於朱虎熊羆顧莫伸於私義有若太顛閔天竊幸託於下風此蓋伏遇某官德符先民道契真主身載采采以昌庶工心憂元元可格上帝思共熙於百志罔求備於一夫肆俾危蹤寢塵殊用某敢不益堅素守圖報異恩不命其承更效斐恭之節惟躬是率勿忘勵翼之誠

回謝知大名府徐觀文書



眷隆體貌恩出絲綸首秘殿之隆名增陪都之重寄縉  
紳歌豔渥澤便蕃伏惟慶慰恭以某官以道事君既明  
且哲氣至剛而養之以直色雖厲而即之也溫以忠清  
舉中臺之綱以靖密筦北門之鑰命周公之事政乃有  
常大畢萬之名裕垂厥後方虛懷以待者德因襲寵以  
彰舊勲克慎克和將底恊心之效立政立事尚須勵翼  
之勤曾慶牘之未先辱誨函之俯逮永言謙抑彌劇悚  
惶

啟

謝中書舍人啟

擢從冊府進直掖垣親翰初傳恍莫原其所致牢辭弗  
獲慚冒處之非宜竊以自昔言語侍從之才實兼文學  
政事之寄因時論治要觀國是之如何鼓象作猷無曰  
辭達而已矣惟帝在宥如天燾臨雲漢之章甚昭雷風  
之號莫疾矧四方其訓無競維人而三后恊心同底于  
道欲助宣于德意宜博于時髦伏念某材技闕然識知



推甚長而無述幾驚過隙之駒冗不見治坐跋垂天之翼須由宮學來列道山方窺未見之書遽有非常之遇自天承詔給札試言顧疑翫馘之詞趣就須臾之頃謂塵燕覽必觸大呵次第兩遷邂逅幾月以諸生之樸學當內史之贊書天威不遠顏初奉清閒之問王言惟作命親聞體要之褒誰容蟠木之輪困如有大鈞之坎北此蓋伏遇某官道熙帝載治翊人文謀謨允臧已糠粃于百世勲業昭赫尚鞭笞于四夷特見推于隱約之中

將遂觀其潤色之效因風動于多士庶間出于異能永惟造物之施不貲諒匪副墨之勤所稱締章繪句况少作之可羞鐵心石腸實平生之自許誓殫一節圖報萬分

謝人薦啟

情不業官初宜謹斥嘉其嗜學更被薦揚欣於所知愧以弗稱竊以士志無欲於近人情喜用其長數學始終實處厥修之半英才教育是惟所樂之三矧逢庠序之



興增闡藝文之盛天回雲漢物鼓雷風列中外之師生  
已為希世出公卿之論議亦足觀人如某者用志甚迂  
受財絕陋未聞道要徒謹師承仕有時乎為貧姑從奔  
走咎莫大於欲得寧復將迎永懷朱叔之顛愚強目徐  
公之通介對山拄頰氣故爽於朝來問路歛裳情每存  
於宵逝陸沉亦分海運誰欺孔蔑自知事方如襲退之  
未試人稍謂能敢圖不腆之才遽玷非常之舉此蓋伏  
遇某官清機絕累冲識照微靜知賢不肖之情陰獎士  
君子之行故雖鄙陋亦委輝光知其亡無忘其能意夫  
可勉如所譽必有所試斷以不疑得於眉睫之間借以  
齒牙之重某敢不益思自貴少副所期道德初心儻有  
成於見效詩書尚友或不但於空言

謝陳左司薦啟

腐儒惰不業官拘士恥於媒已忽叨清舉仰媿異知惟  
時刺部之權宥以限員之法所欲升斗雖固易於嗟濡  
盈前珠璣諒或難於簡汰人豈不以重自任士弗宜以



賤厚誣擁傳百城公相繇此選爾露囊一薦賢才其將  
舍諸得孟明則子桑有知人之稱失柳惠則減文有竊  
位之咎能令喜能令怒嗟定鑑之已移可以北可以南  
信多岐之足泣願觀盛德之士慨想古人之風必忽焉  
於尋常之中獨超然有特達之舉如某者受才不腆用  
志甚迂學無師承既涼涼而踽踽文必已出輒恹恹以  
竒竒未隳良冶之工偶綴太常之第一官下邑兩客諸  
侯盲人臨於枯池冥行已久窮鬼延之上坐鉅譽相仍  
畸孤粗存空乏不糝駑馬戀豆飢鷹隨人方追爽氣於  
朝來更覺平生之睡足惟高卧須青雲之附而著書之  
名山之歸退之不中於詞科人或謂之能也楊雄竊準  
於周易世亦何自好之悠哉此心置且莫論抗塵它日  
始拜德人之容推轂後生創蒙國士之待此蓋伏遇某  
官身備忠信溫厚之德家有文章政事之師見義必行  
可立懦夫之志秉心不撓居多仁者之言靜知賢不肖  
之情陰借士君子之地故如孱陋亦被采収某敢不仰



副所期益思自愛乘流遇坎斷不辱於此身枉尺直尋將有如於暵日過此以往未知所裁

謝雄守辟留再任啓

盛府初開共傾清舉密章上達亟奉俞音內慙申命之  
夏外恐知言之玷惟古在位必使慎簡乃寮為官得人  
所以同歸於治藩方衆建名實相高烏大夫之鎮河陽  
首拔才於處士裴中令之征淮甸至擇吏於廷臣豈徒  
華遠近之觀是乃繫重輕之本見子犯趙衰足以相國  
則重耳之盛不疑於崔群李博得其為人則宣州之賢  
可信然天下有大戒二君子之所就三委質事人阮籍  
難同於蔣濟臨戎佩印王徽獨厚於徐商莫嚴交際之  
間各得進退之分援義以授為恩則多如某者才非時  
須器止近用學雖好古終成擊輓之資仕則為貧深忝  
箕裘之業昨緣舊戶誤寘初筵俎豆則嘗聞之何裨壯  
略書記致足樂也又謝昔賢自知甚明已試如此若乃  
新書之細繹本因議者之建陳第淹歷於歲時稍綴聯



於簡策上之御府豈足紆乙夜之觀副在有司或見取  
丁年之使是纔舉職安敢言勞夫何避引之勤猥借褒  
稱之論果回聰聽俾記後陳燕垂趙際之要衝文恬武  
嬉之積久臨機應變已歸堂上之奇畫智竭誠未廢幕  
中之畫靜言非據尤媿復留此蓋伏遇某官雅德鎮浮  
至誠樂善威令行於草木仁聲決於袴襦敦義府之詩  
書清衷所眷築將壇而齋戒異數方來凡在名聞悉皆  
制可遂令孱陋亦被寵光某敢不恪守官箴勉修身檢

劇談雄辯既乏古人之風正色直心庶幾國士之報

謝梁都運奏舉堪充幕職官啟

知士為難共傾首舉許身不易初託公言既榮其恩更  
感以義竊以因時論治要觀國是之何如為上擇人無  
曰已知而已矣必其才之可用方所引為不虛故燕昭  
有雪耻之心則樂毅劇辛附郭隗而爭往漢宣興協律  
之事則趙勝龔德託魏相以奏言偶契其求恨相見晚  
末由斯進柰不好何借雖損益之未閔審欲趨嚮之同



在豈容冗散輒冒察廉如某者用志甚迂受材絕陋未  
聞道要徒謹師承仕有時乎為貧姑從奔走咎莫大於  
欲得寧事將迎永懷朱叔之頡愚強目徐公之通介對  
山拄頰氣故爽於朝來問路歛裳情獨存於宵逝陸沈亦  
分海運誰期龍章尚數於麈頭牛後每羞於雞口敢  
圖不腆獲玷非常此蓋伏遇某官志亮天功才周世務  
便民富國早推籌策之紆論道經邦超冠侍臣之列每  
嚴簡拔少試陶鎔靜惟筆楚之微姑幸併蒙之大寒暄  
而已敢邀賞於寡辭人士甚多或見稱於小異故先寵  
薦以絕躁求帝室皇居豈無因於北海治中從事知不  
老於荊州某敢不更勵厥修益思自愛無忘所學庶免  
為庸象人之歸不辱其門必報以士君子之義

與陳都運啟

比膺宸綽進陟掖垣不稱所蒙以榮為懼恭以某官疏  
通膚敏愷悌靖恭攬轡慨然久擁光華之節閱人多矣  
具知寒俊之才得於眉睫之間借以齒牙之論遂緣推



挽寢有叨塵緬惟曩眷之隆徒積懦衷之感無從瞻叙  
更劇傾馳

謝定帥黃待制啟

師是

舊國故都歷兩年而三至方伯連率肯一見而再留眷  
然升斗之從悵矣門墻之戀瞻言未遠仰止何窮比惟  
坐鎮之餘歡奉色難之養神明幽贊福祿來崇恭以某  
官端粹靚明裕和博大少謂閔鄉之顏子共推江夏之  
黃香金玉其相孰謂無君子者藜藿不採吾猶及老成

人聖君所以獨知當世最為可倚自臨要閫實賴沈機  
夷狄畏威公顧有雅歌投壺之樂田閭按堵我已陳中  
和樂職之篇觀措紳之無閒言知廟廊之可馴致某學  
不宜於進取識舉昧於窮通漫朱墨之見尋紛筆楚而  
思脫得知千載正賴古書作吏一行便廢此事敢作馬  
曹之對姑收牛背之光必知歲計而有餘顧恐唱高而  
難和雖投劾此固甚易須親憂之少寬而許身士不可  
輕舍門下其安往去留所繫中外焉依拔薤獻規固願



從賓客之未吐茵弛過尚或累陶鈞之私

回謝除右丞啟

祇膺詔綽進預政機竊自省以何堪第因榮而知懼靜  
言所冒實有從來此蓋伏遇某官廊廟元臣股肱舊弼  
斯謀惟我后夙殫共政之誠雅意在本朝樂有思皇之  
士密借進賢之地仰宏舉直之風致此羈孤驟叨眷任  
顧未馳於謝牘已先辱於慶函

上馬侍郎啟

河山同俗竊伏於下風霄壤殊塗未窺於高躅頗因賓  
友嘗達姓名忽聞假道於陪都遂可掃門於候館用先  
旅進輒布卮言恭惟某官植德靜莊賦才英邁心醉羣  
經之奧識窮妙道之原摘藻挾庭早擢巍峩之第敷華  
緯國每傳瑰偉之辭聖主始見而知之廷臣無出其右  
者貴名特起益昭銅柱之餘芳多士相趨不墜絳紗之  
舊業歷踐積星之位躡居惟月之班深簡宸旒峻持從  
橐會元倥偬吏事篤學書不去前賓王明習朝章令人



聽之忘倦既回翔而再至蓋挺特於一心固將訓於四  
方間之兩社上而告后陳合於稷契之言下以覺民使  
被夫堯舜之澤某負能不腆用志甚迂學徒謹於師承  
文漫從於已出永惟盛旦光闡大猷獲川珍嶽貢而鼎  
鼐成用身度聲律而禮樂備日見瑞氣圭告成功邦永  
孚于休地不受其實方即紫壇而祀上帝將鏤玉牒以  
封泰山是惟隆儒籲俊之時爰備攷古刺經之用搜揚  
簡拔已聞冀北之空奮迅超騰豈復周南之滯自憐隨  
牒未免抱關願親華近之儀刑少扣須臾之警歎當賦  
得賢之頌以賡有道之詩跂立郊圻飛馳悃臆方秋聲  
之僚慄諒神韻之冲和尚覬葆綏綏仰符虛佇

與中山張侍郎啟

一辭舊里六換周星匪我伊蒿每切丘園之慕維桑與  
梓實依幙府之庥念雖伏於下風悵莫窺於高躅緬想  
蕃宣之裕茂膺視履之祥恭以某官端粹高明沈深肅  
給詩書謀帥蓋若倚於長城樽俎折衝詎足煩於游刃



方事樞之虛次眷邊鎖之獨賢即聽超除遂登通列尚  
祈燕衛以副頌言

答宋陳州啟

光膺恩綽榮領藩符方眷眷之載隆諒雅懷之增慰伏  
惟其官才周世務智達事經夙推享上之忠蔚有佐時  
之望自將輸於畿部遂列職於禁塗以廣漢之才高既  
為京兆顧汲黯之名重復守淮陽益勵遠圖別需異寵  
念睽違之久矣懷疇曩以撫然正阻瞻承第勤頌詠

回大名徐右丞啟

撫新疆而滿戎偶適收召之音渙大號以疏恩更厚勞  
還之禮雖忱辭之屢控終成命之莫回靜言所蒙夫豈  
無自此蓋伏遇某官忠施廊廟名重華夷有為有守而  
遠乃猷夙懋經綸之業克順克和而祗厥職共高尹正  
之風威申魏博之藩垣惠浹河漳之草木已積倉箱之  
富益無桴鼓之驚節用愛民斯底丕平之績正色率下  
尚須爰立之求顧是迂疎實繫庇賴念未馳於尺牘忽



先辱於珍題感佩居多叙陳因既

回鼎提宮啟

比叨中詔進直西垣初雖罄於忱辭終莫聞於俞旨具膺寵獎徒切震惶蓋朝廷言語侍從之才必極一時之選而山野樸陋遲頓之士躡處諸儒之先學嗜古則難施文耻俗則近僻勒移招隱或云有得於從來潤色論思敢曰不能而自恕獨相贊以得位之喜豈所望於責善之交伏惟某官世代王言身傳家學自擢詞科之始已期禁路之遊遠心自放於樵漁榮願猶存於舊故欣其試用契所品題發秘思以占咫尺之書屈高致而用世俗之禮眷勤特異感誦無窮

回謝北京梁太尉啟

擢自禁林進居政路罄忱辭而靡讓獲寵渥以增慙惟中臺喉舌之司實並釐於百職而二丞綱轄之任乃參翊於萬幾儻非內有協恭和衷之明謨曷以仰晁經體贊元之餘論詎意諸生之末忽塵四近之聯明堂會于



象材何拱把之足用康瓠列乎九鼎顧朽虛之可羞靜  
 言所蒙夫豈無自伏惟某官忠施廊廟名重華夷旌旄  
 顯南屏之雄管籥付北門之舊黃髮台背而眉壽無害  
 已占難老之符袞衣繡裳而德音不瑕更聳具瞻之望  
 獨借進賢之地仰宏舉直之風曾是羈孤每叨慰薦登  
 門一紀共推賓客之餘出幕六年遂玷機衡之列期益  
 堅於報國庶弗累於知人

白賦集答河陽許尚書啟

寵膺詔綽榮易藩符脩好睦隣方幸疆圻之接騰裝便  
 道遂成川陸之賒沐華翰之光榮喜冲襟之泰定伏惟  
 某官懿文經國雅望冠時以八座之清班付三城之重  
 鎮別需異數益暢遠猷悵執手之無階惟加飡之有禱

回定帥曾顯謨啟 孝廣

趙魏相望河漳中阻隣驩不替緘貺沓來就聞屏翰之  
 安居有林塘之勝嘯訝暇豫祉福駢蕃伏惟某官名重  
 天朝任隆帥閫氣志真曾子之勇首尾蓋常山之彊方



汪想於履聲即進陪於廟論尚賒瞻際益冀燕熙

回定帥王顯謨漢之啟

護邊累歲賴庇後人南北分馳未忘惆悵寒暄來問尤  
佩勤渠就聆威惠之孚休有福禧之應伏惟某官夙高  
英望親被睿知兼文學政事之科乃禮樂詩書之帥諒  
無煖席必促造庭尚阻瞻承更祈葆蓄

回謝越王啟

某啟伏節燕陲每悵瞻依之迹飛毫漢邸曲敦紀錄之  
私伸牘知榮撫躬增懼恭惟某官天潢毓粹陽琯專和  
懷德維寧爰峻宗藩之望為善最樂式型公族之儀恢  
遠量以兼容推至誠而樂與遠貽華翰加賁蹤鳶鳳  
高騫仰文辭之巨麗瓊瑤匪報驚情眷之綢繆葦戶生  
輝珍緹是寵方清飈之應律宜壽體之介休詠頌有加  
名言奚究

回賀安化郡王啟

誕孚廷號參穆宰司載隆磐石之宗益賴維城之助伏



惟其官道襟恬粹儒術淹該振振為公族之表儀挺挺有  
前人之風烈夙被眷知之異寔膺命數之優四履疏  
封不改山川之舊三台拱極兼華袞舄之新非惟展親  
是為旌德顧未馳于慶牘已先辱于教函

到北京問候河間帥張顯謨啟

抱關擊柝本為抹死之謀祭竈請隣稍作居官之調逖  
瞻舊府未報厚恩含糗羨藜敢論太牢之滋味震風凌  
雨始知夏屋之帡幪歲道邁而跡踈形兀留而心往寥

兮秋之為氣申如子之燕居諒親安而民懷宜上佑而  
宇泰恭惟某官沉潜剛毅蹈履直方盖有德必有言固  
不習無不利鄉者霸上棘門如戲既聞廉頗李牧為人  
大驚一軍盡護諸將三命茲恭予敢侮千里決勝吾不  
如南山維石巖巖坐騰民頌棠棣之鄂韡韡行集天朝  
置諸論道之司溢我用儒之效某自試如此亡他可知  
俛使負郭有田豈至以倉為氏飢驅彭澤三經松荒身  
悞柳州萬事瓦裂睡尋足處飲欲無河還下惟王郎時



學擁鼻洛生詠詩昌可卜蓋惟窮者而後工文成自憐  
間有天下之奇作尚憑曩春輒布狂言但縻畢萬大名  
之都邈絕河間雅奏之地門闌正阻杖屨莫陪仰惟注  
意之深倍冀經生之謹

賀白太宰啟

誕揚題冊爰立真儒帥瞻巖巖式儀刑于百辟王命肅  
肅聳觀聽于四方超名位以懋格天之勲隆禮貌以樂  
尊賢之等眷有德之君子相右文之邦家夷夏均歡神  
人昏悅恭惟慶慰伏以其官儼直方大之厚擅希夷微  
之高有貫通六藝之才守之以卓有酌酢萬變之慮尊  
其所聞以智而為帝謨納誨而輔台德立百司庶府而  
茲乃俾又能官人安民而彰厥有常雪霜降而松柏後  
凋宮室成而棟梁是賴果符夢卜入輔聖神當開疆復  
古功成治定之昌期進敏德懿行議明慮遠之大老以  
富民而封丞相可見上心虛正寢而舍蓋公益隆治道  
永一人之膺福底三后之協心三年化五年定而勿有



以閒之鄙夫寬薄夫敦亦何足疑者殆生民以來未有  
固能言之類莫加親九族而和萬邦仰贊聖功之大撫  
四夷而附百姓更觀賢業之崇某密辱深知欣聞大拜  
卿雲附日蔭不問于秦燕越鳥巢枝歸倘從于林壑拳  
拳之抱望望于茲

賀吳門下啟

黼座眷賢對揚休命黃扉論道圖任舊人國勢增隆師  
言昏穆伏惟歡慶恭以某官材宏器博志正行醇裕陵  
左右有民首膺寄屬哲廟祇服厥考更賴謨明亨嘉干  
載之逢翊亮有朝之老卓然特操簡在睿衷比以太原  
而召晉公蓋為蒼生而起安石少留北闕再陟東臺詢  
事考言諒益堅于素履贊元經體期永輔于熙朝某逖  
守邊藩坐依鈞芘莫遑瞻慶徒切詠思

賀宣撫張龍學啟

宣威制勝坐臻朔漠之空懋寵酬庸首列河圖之邃淵  
裒益簡輿論文歸棻以某官厚德鎮浮懿猷經遠詩書



禮樂義之府夙推良帥之風智畧謀慮朝之淵凜有名  
臣之體任久專于外閫望益倚于長城果資撫馭之才  
並總蕃宣之寄蜂屯蟻聚既銷並塞之窺觀唳風聲遂  
底侵疆之復惟勲名之鮮儷宜命數之存頌顧豈序遷  
蓋將柄用某論交有素贊喜彌深乘障相望方愧馮唐  
之老親隣為寶尚依張仲之賢悵占遇之未遑徒燕願  
之是禱

賀北京許太尉啟

頒冊明廷建牙巨鎮示帝衷之眷注極儒道之光榮伏  
惟某官學綜古今智周事物畢公正色亮四世而克勤  
山甫小心事一人而匪懈早辭繁於左省爰居守於別  
都威懾河山慮寬宵旰乃寵廟堂之舊德亟頒旄節之  
異恩惟卧鎮之累年諒登庸之不日莫遑瞻覲徒切詠  
言

梁帥賀呂太尉啟

錫寵帝廷還榮書殿慶行里閭喜動播紳伏惟歡慰恭



以某官德契泰初道臻先覺發明六藝傳聖學之淵源  
輔翼萬機啟神謨之經緯夙著格天之業存聞辟國之  
功若時尚父之鷹揚亦佑成王之龍受不改險夷之度  
更追閒曠之游果動睿衷亟頒異數坐令天下心期大  
老之歸來想見吾君日佇真人之警歎即觀爰立以副  
具瞻其縻蹟河山嚮風淮海聆詔音而竊抃扣賓謁以  
無階顧是詠言倍於綸綍

賀鄭樞密啟

肆頒宸綵擢冠樞廷夷夏聳聞縉紳交賀伏惟某官  
受材宏天植德純明奧學窮經浩若源淵之富英辭  
貫道煥然黼黻之華比被眷於北扉亟升賢於右府  
帷幄決勝千里輔成繼伐之功文武為憲萬邦坐獲  
來同之效授之魁柄簡自淵衷視君如腹心諒深勵翼  
用汝作舟楫宜遂登庸屬有守於封疆豈無依於廊廟  
莫諧瞻慶徒切詠言

賀鄭樞密啟



建頌恩制還冠樞廷舊德載崇遠人率服伏惟歡慶恭  
以某官蘊博大高明之學負經綸開濟之才文章追三  
代之純議論陋百家之小道德名世國之光輝謀猷告  
君予有疏附歷踐凝嚴之地亟魁宥密之司四方時靡  
有爭萬里敢不來享自均勞於琳館每促對於燕朝雖  
謙虛久事于循墻而遐邇日期于補衮延登右府用績  
前功外已震於天聲內益隆於國是運籌決勝顧足煩  
譚笑之餘當軸處中  
心旦暮之近某睽遠寢以瞻  
慶莫階陳力已疲尚忝藩垣之寄辱知最厚更深帷幄  
之依

賀同知蔡樞密啟

進被宸恩入陪政路四方是則共高輦轂之風三后協  
心對陟樞廷之峻邦家賴慶夷夏聳聞恭惟某官稟坤  
德之直方養浩氣而剛大惟和惟一而祇厥職夙推應  
務之材有為有守而遠乃猷素蘊致君之術諒功名之  
不釋繇中外以游更時論交歸淵衷密契歲在盟府既



肆頒恩制還冠樞廷舊德載崇遠人率服伏惟歡慶恭  
 以其官蘊博大高明之學負經綸開濟之才文章追三  
 代之純議論陋百家之小道德名世國之光輝謀猷告  
 君予有疏附歷踐凝嚴之地亟魁宥密之司四方時靡  
 有爭萬里敢不來享自均勞於琳館每促對於燕朝雖  
 謙虛以事于循墻而遐邇日期于補衮延登右府用績  
 前功外已震於天聲內益隆於國是運籌決勝顧足煩  
 譚笑之餘當軸處中諒不越旦暮之近某睽違寢以瞻  
 慶莫階陳力已疲尚忝藩垣之寄辱知最厚更深帷幄  
 之依

賀同知蔡樞密啟

進被宸恩入陪政路四方是則共高輦轂之風三后協  
 心對陟樞廷之峻邦家賴慶夷夏聳聞恭惟某官稟坤  
 德之直方養浩氣而剛大惟和惟一而祇厥職夙推應  
 務之材有為有守而遠乃猷素蘊致君之術諒功名之  
 不釋繇中外以游更時論交歸淵衷密契歲在盟府既



灼知先正之勲尚有典刑當益侈象賢之眷蓋欲保大  
定功而決勝乎千里必資同寅和衷以為憲于萬邦允  
膺圖任之艱乃踐久虛之位善繼人之志上方嗣代以  
廣文聲率乃考攸行公盍奮庸而熙帝載佇期爰立益  
副具瞻某護塞何功實推本廟堂之論蒙庥有自念方  
圖田畝之歸趨慶無從朔風增想

賀樞密啟

寵膺制綽進執事樞宿望所隆僉言惟允伏惟歡慶恭  
以某官宏才經遠與學窮深真吾齊魯之儒有古魯閔  
之行頃居憲府人自肅而朝廷尊比長地官賦不加而  
財用足延登右席倚鎮四夷庶事康哉行慶國鈞之秉  
老夫耄矣且欣廟算之憑屬瞻覲之未遑但傾翹而無  
已

賀戶部梁尚書啟

茂膺天指峻長地官邦脩永圖人起厚望伏惟歡慶竊  
以自古有作惟政可以得民財當今所宜其留莫若藏



天下贊化育以廣生殖則道繫上宰脩法制以均有無  
則職歸司存方縣官調度百出之艱欲國勢增長十倍  
之裕於斯為盛舍公而誰恭以其官䟽通敏明英偉絕  
特學傳家法之舊譽占相閔之先以中外所至辦治之  
才膺羣下莫可跂及之眷恢恢之刃播紳既已聳聞巖  
叢之瞻廟堂更宜躡處來膺妙簡進異要權菲服卑宮  
顧方勤日旰念強兵足食當不減河朔時必大建管籥  
扶世之功庶悉掃異鏹容身之弊矧周任冢宰職專理  
於貨財而唐制中書事亦兼於錢穀更期大用以暢遠  
猷某比幸趨承似蒙知察敢致區區之慶以盡惓惓之  
愚

賀河陽許尚書啟

諏辰叶吉露版布新開盛府之潭潭方隆注意詠清風之  
穆穆諒可慰心伏惟某官德業閎深材猷肅給詩書  
謀帥蓋若倚於長城樽俎折衝詎足游於餘刃別期異  
數進陟近班正縻芟舍之居密借寶隣之潤無從慶謁



但劇傾翹

賀宮使鄧觀文啟

伏審祗膺中詔入覲明廷留使琳宮進陪經幄士有隆  
儒之喜朝多圖舊之榮伏惟歡慶恭以某官學博而行  
醇識精而慮遠器足以任天下之重智足以周事務之  
微文章追三代之風論議綜九流之奧頃由禁路亟預  
政機以道覺民無不被堯舜之澤斯謀告后有合于稷  
契之言裕然出處之間允矣重輕之繫比膺臨遣暫倚  
居留三台六符俯照河漳之會八鸞四牡式遄象魏之  
還申鎬宴之多儀促漢釐之密席數咨大事諒多警欵  
於吾君再列近司不待營求于外野別需異數永輔昌  
期某量已無它蒙知有數高閎可仰共深維石之瞻末  
路何依獨借非煙之潤莫伸慶拜更極欣翹

賀中書徐侍郎啟

顯膺中詔進貳西臺真儒用而奠枕于京允賴儀刑之  
舊天下安而注意于相載觀勵翼之圖旒宸虛懷播紳



引脰伏惟歡慶恭以某官以閎深博辯之學負經綸開  
濟之材色雖厲而即之也溫氣至剛而養之以直特操  
堅於金石先識炳於著龜治國忠言蚤見於施廊廟裕  
民仁政絜每效於藩垣少留兩河式遏外寇馳單使以  
諭敵則游騎不敢迫東鄙唱大義以勤王則勁兵相繼  
集近畿人心保其無虞有金城之千里國勢因此底定  
若泰山而四維亟歌大老之來歸用賞庸功而重疊雖  
君子不以得位為喜而朝廷方進有德以尊行入告於  
謀猷必展盡於底蘊明政刑於閒暇遂致兆民之永康  
成道德之安疆坐使四方之無拂某仰孤委任自抵讐  
尤重惟前此罪戾之人未有獲面宰輔之理偶爾萍逢  
之寄會逢衮繡之迎身親見之既動一夫不忍之念天  
其或者將啟百口更生之塗永言依歸尤倍倫等

賀禮部陳侍郎啟

光膺天指進貳春官帝眷益隆師言載穆伏惟歡慶恭  
以某官學窮聖奧識照幾先懿行高風優入淵騫之列



英辭閎論俯收晁董之科早宗經席之微言游決容臺  
 之疑議遂錫命書之寵躡陞禁路之華典三禮於虞廷  
 無易直清之德諧萬民於周室允資詔相之勤方懋遠  
 猷別期大用某猥茲分部莫克造門逖聞除目之傳寔  
 倍輿情之喜

賀趙左丞啟

寵頒明詔進陟左綱中臺化原永底萬邦之人通聯世  
 表共榮千載之逢四海傳聞一辭歡喜恭惟某官負經  
 綸之學佐明昌之期簡於帝心所迪乃真儒之效策以  
 時事有陳必先王之言以佐上則明主無為而尊以惠  
 下則斯民陰受其賜后非賢不乂休命顯祇於對揚民  
 其勅懋和明服式時於有叙允洽登庸之望更需弼亮  
 之謨行副具瞻以膺大任某猥辱知憐之舊欣承眷用  
 之優賦雨雪之霏霏曾是乘邊之久託鄉雲之郁郁將  
 諧問舍之謀瞻拜尚賒想望增劇

賀宇文右丞啟



顯盼詔綽入總政綱盛德所臨國有得賢之美群情胥  
悅士知稽古之榮參翊萬幾增崇四近恭惟其官稟高  
明之絕識負經濟之宏才囊括底蘊而莫知有餘瓴建  
淵源而亦復不竭陪荷橐之議論思久罄於周行躋鼇  
禁之班視草親承於密旨號令多出於手望實孰居其  
先簡在上心夙有進為之志緝熙帝載果膺圖任之公  
方紀綱百度之修適聖賢千載之遇儒者在朝政美允  
資贊贊之襄大臣以道事君益仰明明之輔尚須柄用  
式副巖瞻其早辱定交逖聞傳命防闕有守載逢雨雪  
之霏問舍可期幸借慶雲之蔭方賒接待彌極順依

賀薛右丞啟

敷錫命書召還政路大廷促對喜見儀刑舊德奮庸望  
傾華夏伏惟歡慶恭以其官學窮聖奧文闡道原駕說  
清時歷處師儒之地被知真主亟居丞弼之司屢告辰  
猷一尊國治自均勞於外服尤注意於本朝周大夫思  
以公歸共熙庶績薛居州在於王所允叶僉言暫持綱



輅之權即正鈞衡之拜念久違於高躅幸仰託於餘庥  
瞻慶未遑詠懷曷已

賀徐司門錢寺丞啟

榮陪陛對光奉詔除職峻望高恩隆禮渥伏惟歡慶恭  
以某官才猷膚敏器識閎深風力自將蓋所臨而必治  
公忠匪懈故無施而不宜方成王興龍受之功而尚父  
有鷹揚之氣金湯備豫收堂上之奇兵樽俎雍容賴幕  
中之婉畫倂圖即入占奏益詳果動睿衷亟躋華貫將  
還舊府共傾省寺之清班行上新書更俟朝廷之異數  
某從游有素展慶可期頌詠之深敷宣固既

賀永興帥賈侍郎啟

寵膺制綽榮易帥符以洛陽王佐之才牧關中天府之  
地諒雅懷之慰愜增吉履之粹和伏惟某官世戴忠純  
職聯華近蕃宣已試付旂旄之三千倚注方隆鎮河山  
之百二永言桑梓久芘葭葦矧宿好之不忘悵疑承之  
未卜更祈珍畜別俟超除



賀定帥韓侍郎啟 粹

疏榮北闕擢帥中山眷寄益隆威名已著伏惟歡慶恭  
以某官材資邁爽識度曠夷聲猷秀發於勲閔光寵亟  
騰於禁路以文武兼資之略領父兄舊治之邦申伯于  
蕃方共榮於世執召公是似將別對於王休屬此拘縻  
阻伸瞻慶跂旌麾而雖切叙竿牘以奚裨

賀真定帥張侍郎啟 代河北  
陳漕

伏審光被恩綸榮更帥閫訓詞甚寵威望已孚伏惟歡  
慶恭以某官氣勁才高智深慮遠自奮亨嘉之旦蔚聞  
開濟之風比使西畿尤當上意入持從橐任隆版部之  
繁出布藩條治聳三城之重惟常山之巨屏控朔漠之  
殊隣障塞疆雄方倚運籌之妙林塘勝絕益資緩帶之  
清諒無煖食之淹即被賜環之名偶茲將命實遠親仁  
顧展愛之未遑第詠懷之不已

謝到任啟 代河北  
漕候臨

將翰南紀初無善政之聞改使翔陸更荷誤恩之及即



工伊始撫已增慚伏念某植志甚迂受才不腆少承義  
訓粗知詩禮之風親會聖時因有功名之望越從筮仕  
頗識首公聯鄉棘以居中早經推擇懷郡符而補外惟  
厯承宣膠舟適可於坳堂龜手亦安於泝澣謬當朝選  
疊畀漕權取三百廛之禾固已空餐可愧奏十九牛之  
刃尚何餘技足觀忽奉明綬俾分劇部惟兩河之空代  
占諸道長之雄金湯百城連衡方面貔虎萬旅仰給縣  
官敵騎既勤而有委積之供水行雖順而有限防之繕  
茲焉試可不曰才難方虞未厭於師言俄許入聞於睿  
首趨雲天之雙闕恍若仙遊瞻日月之重瞳溫其晝接  
褒稱狎至遣勞俯加载華原隰之行漸歷州塗之舊題  
輿平試嗟陳迹之莫追露檄遷帷或先聲之已偃永言  
冒昧實所超踰此蓋伏遇某官論道經邦代天理物伊  
尹咸有一德澤無不被之匹夫周公勤施四方皇有克  
生之多士魯是哀遲之迹最受特達之知運播物之鈞  
已出陶成之溥博開翹材之館備聞教戒之雍容既久



在於主張乃極垂於驅策其敢不益堅壯節更勵遠圖  
時和歲豐竊倚餘庥於道極粟腐貫朽願見成效於司  
存

跋張僧繇畫卷

讀退之畫記真若見畫今觀此畫得其意於形似之外  
還如讀退之之記或謂畫記非退之平生得意之文余  
弗信也宣和癸卯正月十二日履道

跋魏王書帖

代韓師美

故光祿卿大原王公與先王有研席之舊且同年登科  
某不及見之晚識公之孫大府丞于京師出先王手筆  
兩帖惟先王取友天下所與傾倒必世之君子長者此  
帖作於邊侯兵革間覩縷諄復并及家事曲折且托之  
以急難以是知公之賢自為先王所厚蓋不專以舊故  
也因泣而書之政和六年四月十五日男具官某謹題

再跋魏王書帖

代韓師美



某兒時頗見先王稱聰師戒行專愨遇事不苟先王出入中外不得嘗在鄉閭高魯而下墓墳悉委師營守師尤為盡力先王亦多之今師下世久矣門人清占尚藏先王與師書帖捧觀手澤追惟曩昔嘆歲月之道邁望家林而北首不覺流涕輒附載於後

跋李長茂畫卷後

余頃與元量相從于魏後二十年余來居守而元量適在鄉里余罷府事待命康樂坊居益相近元量持鄆人李長茂所畫松石與河間權朝美俱來且言長茂之賢不輕以畫與人而畫亦高竒有思致吾三人之聚于此此畫之不易得皆宜作詩余最老大久不近筆硯元量約窮無聊之久一意文字所造益高妙朝美筆刀膽氣不經世故挫抑尤豪健壯偉請兩公遂賦之余當鼓譟助其旁此天下之至樂平生卓絕傑持之觀也靖康初元正月二十四日定武王某題

跋李端叔帖



端叔從故候蘓公來鄉閭倡酬題記處處有焉端叔亦自有蘓李同時之語觀此詩帖撫事懷人惘然久之紹興癸丑八月朔定武王安中履道題

欽定四庫全書卷

初寮集卷八

碑誌

故贈昭化軍節度使楊應詢神道碑

宋 王安中 撰

政和六年某同修國史考戚世序維章惠皇后輔真宗擁翼仁廟躬禋祿調護之勞景祐中創立皇嗣援納英武祖有大功於兩朝大觀元年上幸興德院顧懷祖考錄定策之臣寵逮子孫深惟景祐之議灼見天心卒然



初謀入繼大統繫后一言基命萬世宜褒賞外家顯示天下今其姪孫某方守雄州治有異績乃超授泰州防禦使永橋之役以洋州觀察使為大名府路馬步軍副都總管詔屯兵河上命下屬疾猶自方戒行已而告薨訃聞上深軫悼特贈昭化軍節度使諡曰康理既塋其子請辭刻墓隧之碑某曰先後社稷之勲具在史冊而公盡瘁於國有太常之謚幽堂之銘可信不疑灋宜書以垂後公諱應詢字仲謀其先益州郫人章惠之貴移籍開封公贈太師中書令知信宿國太夫人蓋氏之曾孫建寧節度觀察留後贈太尉宗景宗安定郡夫人呂氏清和郡夫人張氏之孫皇城使贈右金吾衛上將軍永節咸寧郡夫人王氏永嘉郡夫人陳氏之子生數月祖蔭以官長而開敏倣儻慨然有志於功名初監威勝軍西湯驛應羣牧使韓縝之辟與契丹畫境代北河決孫村修河司選為僚事必俾公稟於政府條析明辨大臣咸以為村久由河北副將如擢知順安軍年志盛壯勇於



有為而勲皆中理治譽翕然邊人馳射為俗公興學迎  
師執經講閣儒冠四集戶有絃誦民救父毆搏仇致斃  
公閔無兼侍殺且非意吏固當以絃公固請讞詔果貸  
死時金吾為保州壤接化均兩邦歌之移守信安未行  
改保定坐姻家左遷歷京西京東二將遭外艱去職終  
喪從熙帥築金城關遂領京東兵今皇帝即位再守順  
安召見語當上意契丹使賀入寧留節留副接送伴移  
知岢嵐軍未赴易霸州歲大飢頽瘡賑之募民開陂澤官  
助其費使食其利所活萬計塘灤迫城漸加積潦至將  
戶以行公塘增隄為長衢濬傍地以洩水自是人無病涉  
窮邊無醫公請立法頒太醫方書於州輦所用藥於帥  
府市揭名價取薄息以供餽直衆賴以濟召為崇寧元  
年賀契丹正旦副使陞對漏下八刻即其日兼閣門通  
事舍人公恬於任進初命三班奉職積四十八年而為  
文思副使及此膺上親擢時論尤以為榮上付公五事  
蜜刺於契丹屬耶禧立慶弔交馳吉凶禮瀆公崇大體



不問細故北人愜服歸將至其中京送者請馳入城  
為哲宗忌又留明日赴其故主祥祭衆疑改故事宜無  
朝命公曰中國以禮義為四夷所尊彼以先帝之故而  
並行因為其主而少留此善也意也奈何拒之遂聽其請  
後著為令半道除湖北沿邊安撫副使覲辭皆對獎遇  
彌渥得北國八事為別錄奏之上俾歸諭諸帥申飭武  
備如公所陳會雄守罷即詔攝守公入奏事究言北方  
利病上延問甚款及辰正公遽趨下命改日再對面授  
西上閣門副使三年遂知雄州兼制置屯田使河北沿  
邊安撫既統郡十六事聯四帥其任既重而控北國往  
來之衝移檄占詞動繫機會守將非通古今職度宏遠  
則武猛失和輕懦招侮公世官朔陲因俗施政小大悅  
附沈謀而善斷威望隱然名震敵境契丹以夏人連姻  
請所還削地使不獲命是冬引兵而南受禮于幽州上  
以羣疑訪公公謂契丹盟誓百年酣嗜惰逸兵不素厲  
矧仰歲賜恩給諸蕃詎敢輕絕於我殆虛誑也無恃其



不來恃吾有以待之惟蒐卒時糧示以形勢明年契丹果北走上善公策遷引進副使又遷西上閣門使且俾再任五年春契丹以其相蕭保先牛溫舒不時來使必欲為夏人得地或曰兵隨使入邊州皆警上重其事乃以公副樞密直學士梁子美往迓于境二使初以國相欲貴倨自異公揣知而逆折之距國門一舍上馳使賜公金帶及門又命近待問契丹情偽公對曰彼無能為其夸肆大言徼幸萬一耳唯堅前議彼計索矣既對具奏方畧契丹訖去如公謀御史治永靜妖人方畧誅逮滿獄公徐為上區別天慈惻然止坐首惡貴近知而不敢言者頗有愧色上因命公有所論奏疾置達勿闕有司尋兼高陽關路兵馬鈐轄所以慰遣甚厚李勉嘯聚亡命匿西山為盜并鎮令軍攻之發民轉餉兩路騷然朝廷罪部使者玩寇責戰日急公言師老患生恐甚於勉願罷諸軍將裁留邏兵扼險困之勉等遂降契丹使北還必以夷樂逆於白溝前此嘗有私見歸信容城令



汪慈明自言其名者乃契丹寵伶具聞幾事願得內附  
令疑而却之邊臣遽奏其去密詔委公暨慈明丁寧必  
得且有異賞公授謀以術物色敵中卒與偕來送子京  
師其語不妄遂命以官理雖彼至親終莫之覺而公避賞  
絕口不言故時諜語不根眩悞耳目公參伍檢核厚其  
賞犒聘使之出必選諜者潛以左契見於敵帳亟先馳  
歸動靜悉以聞使還驗皆合上喜進東上閣門使行輸  
之民困敵貪虐公戒吏勿擾用助偵察旋以覘報精審

拜四方館使公以褒典再下因是固辭推公僚佐上多  
公不伐均賞有差公明於用間敵在目中其所指取如  
探囊物而人莫知謀所從出然事有當祕不可得而書  
者觀上之屢賞則公成效多矣計司以邊食之乏移粟  
於滄公疏植其謬以雄一州須十萬斛科車括船三年  
乃畢豈惟民勞而水陸餽費二萬一千餘緡槩之諸州  
十倍此數請均餼錢增價以糴詔立罷運璽書報公事  
有未便無憚條列已而粟集塞下乃撤舊倉之隘宏壯



而一新之大觀初公既以章惠前功躡遷秦州防禦使未幾天子受八寶敷大慶又拜沂州觀察使陞本路馬步軍總管仍以子澤書沿邊司機宜文章公感殊遇益罄忠力奏置本錢二十萬收其贏以養士士奮於勇始公攝雄州以歸信容城弓手敵憚其勁議增倍為千人衆意難之公獨曰縣必有弓手本以備盜豈為隣國增之敵將為辭且武技之精去鞍疾馳射神臂弓百步命中增倍為難上遣使按實又擢公子閎門看班祇候

毋喪乞解官不許勅有司具葬公乃請入覲冀陳至情甫及都城易定州路副總管尋改西甫副都總管既內徙始聽終制禫除提舉萬壽觀副館伴契丹使上勞問良久公自叙感泣錫御茶綺錦以助私覲館例賜溫州柑而貢包未達吏取他以賜敵不受其求真者須小使送之涿州公議之曰本朝唯餽北主則邊臣為小使使者敢自北耶敵皇恐出拜公密奏柑微物仍許以貢至仍賜敵又喜過望力請扞邊復為定州路副都總管徙



真定不行踰年移大名府路以病請致仕翼日薨於魏  
 實政和五年正月壬辰享年六十有三詔官親屬五人  
 遷一子閔門祇候賻贈金帛加等其年四月辛酉塋祥  
 符縣開封鄉毛郎村之原元配趙氏繼室兩張氏皆贈  
 碩人祔塋公墓男澤忠訓郎閔門祇候淵儒林郎深保  
 義郎女長適修武郎趙景之次適承節郎閔璟次適將  
 仕郎鄭彭年一在室孫植招保義郎拱朴未仕女孫三  
 人皆幼公天資孝友金吾之歿哀毀骨立家時尚貧塋  
 其族十有三喪聚食者百餘人及貴恩義益篤推蔭兄  
 息歿之日季子猶未仕輕財仗義所交皆世名人士去  
 門下踵為達官政簡而破惠姦植伏庭無訟民畫像事之  
 治軍不煩士卒畏愛所在肅然胸次落落坦誠待物於  
 事若不經意而機畧明悟當大利害衆方駭惑談笑立  
 決儀幹秀偉博學而好屬文敏於辨論上每命使必為  
 選首方時治安護塞總戎折衝鐔俎有古良將之風以  
 身許國遇事敢言上察其誠眷倚特異受中詔四十有



三親灑宸翰者四觀其奏議炳炳數百篇可以知其忠  
矣 系曰帝德天覆威懷北戎粵有良翰時維楊公公  
才文武王國之傑受任朔方世載勞烈帝曰汝能往使  
于北遂分將符鎮撫吾圉敵援夏重請還削地使來非  
時洵洵群議公折其驕彼謀斯沮狼貪革心拜耳徐去  
治雄六年兵厲食衍謀良削盟功高用間章惠之勲褒  
恩及族乃如公賢克荷恩錄大任任導河以既屬疾慷  
慨治行匪躬之恤訃聞于朝寵贈加謚惟帝念終哀榮  
終始毛原膺膺此佳城公乎千載其凜如生

南陽伯梁公神道碑

政和六年五月某甲子南陽伯梁公卒于東平之私第  
明年某月某甲子塋于涇城登庸鄉執政里又明年其  
姪寧遠軍節度使大名尹子美以書抵太史王某曰先  
丞相八子叔父最與吾齒相若少即相愛吾先公兄弟  
蚤世獨叔及吾被遇今又不幸既就窆窆而墓道之碑  
未有詞不但無以慰叔父之孤雖吾亦不忍也願得子



文某頃官大名見寧遠歲時訊季父起居細書累幅間  
得御府珍異之賜亟作詩往遺相與酬答其意勤甚今  
敢不承寧遠之命乃次公行事公諱彥深字純之其先  
泰仲之少子康封於夏陽梁山是為梁伯子孫因國為  
氏漢自河東徙安定後又別出為河南天水二望而公五世  
祖贈夏國公惟忠始居東平諸梁相傳望安定曾祖  
諱文度故贈太師中書令兼尚書令魏國公妣周氏韓  
國太夫人祖諱顥故任翰林學士贈太師中書令兼  
尚書令周國公妣閻氏魏國太夫人考諱適故任太子  
太傅致仕贈太師開府儀同三司中書令兼尚書令徐  
國公謚莊肅妣任氏越國太夫人公少無戲事欲以學  
問自奮顧嗜作詩捉筆輒疊疊不自己莊肅公異之問  
命公賦百題一日而就以莊肅恩補將仕郎守秘書省  
正字調監開封府陽武縣酒稅改簽書兗州觀察判官  
廳公事山東故推梁氏為冠族初試吏不負恃門戶能  
舉職業丁莊肅憂服除監在京都茶鹽院改通判青州



丁越國憂服除通判邠州會西方進築公以所部民夫  
從軍深入調護有理獨無所亡失重書獎之代還勾當  
在京諸司專勾司歲終會諸路造軍器費得辟名失財  
無慮二十萬有奇出知沂州放是沂多盜公慨然曰欲  
惠吾民必盡去此乃大為約束課吏購捕賞罰必如令  
盜奔它郡獄以屢空部使者論于朝即命在任徙單州  
州之城堞積歲頽闕公以謂非戒不虞之意稍調羨卒  
完之訖後公私無所預徙邠州河南邊二敵而泐近右

隰公至即為備豫守禦之計儲積器械無有不具治有  
聲績擢知海州未行政徐州徐汴泗所滙地大事劇公  
益出政術為精明齎邀郡務民訟迎剖立決其僚涉筆  
畫符檄而已屬頒學制泉法公推行為一路冠優詔進  
秋俄以知齊州居養安濟令既下公仁人也奉行尤力  
賞行特許地之親族劇賊李定推剽齊中公親指蹤捕  
得并其黨流遠方閭里帖然有甘露降于州廨人以為  
公惠政之應朝廷賦課最滋欲用公春秋寢高間語其



子姪曰吾仕至二千石幸無過謫以辱其先世今老不歸託林壠自休其晚晚之力尚矣侯哉乃上章丐閑得提舉南京鴻慶宮凡三任其卒也年七十三積官至中奉大夫初室任氏繼賈氏皆封恭人男子晉將作監主簿子宰奉議郎通判南安軍子約校書郎子簡奉議郎主管成都府崇道觀皆前卒子坦宣義郎主管信州上清宮女二人長歸選士尹東美次歸中大夫都水使者孟楊孫男慶祖亨祖郊社齋郎遵祖襲祖奉祖假承務郎齊祖蕭祖衍祖未仕孫女十一人已嫁者三選士任希績張大臨束德孺其壻也曾孫男議端毅端顏公資和厚易直內不立城府語輒傾倒不問向人為誰卒死之雖所叵堪耐了無留恨親宰相子習尚樸素無耳目之娛歷典五郡慈祥豈弟去輒見思至臨劇除暴則凜凜有前輩風退而里居觴詠瀟散益讀方外性相書與世相忘其平生蓋可考已惟梁氏世以文章魁天下至莊肅以面折廷爭為仁宗皇帝所器遂至大用出入將



相名震夷狄然於道大難合氣剛易退而其言不朽天下之士至今誦之昔臧哀伯不志德諫周內史曰臧孫其有後於魯乎其後文仲武仲宣叔果相繼用於魯今莊肅諸子雖盡於南陽伯而寧遠頃自中書侍郎出領方任十年于茲以有家世節旄之盛功業福祿未艾然則天所以報莊肅之遺直者不在其子則在其孫曾何啻如魯臧孫者哉南陽伯身有德善又故家遺澤之未泯其三世子孫之衆如此豈可不自勉耶謹系之以詩

曰 梁世典學二魁一相相維莊肅名隘天壤莊肅八子衆德之分有得一體則稱其門維南陽伯豈弟是似治郡雍容如古循吏沂單西河地褊易治聊以暇餘除盜飭備彭門濟南實一都會公亦恢恢游刃餘地教行校庠利美鳧冶威靖里閭仁逮鰥寡善政召和零露如飴國有懋賞民有去思公歸就閑亦既壽考曾是愁遺以殿諸老我詩誰從寧遠之言碑于墓墜爾後人

姚將軍墓表



故贈左監門衛將軍姚濟字公才世為隰人父始業醫而將軍少獨嗜詩句筆札駸駸可喜然以家世故終於方術之學易入推日星躔次寒暑節候五行王哀相山川風水背向宜吉可居可葬皆極其妙與諸儒試有司不中即拂衣去專學醫杜門著書欲自名家間語白其父曰褊陋之地終不足以成名仍辭去游行四方初客京師僧舍隣有病傷寒者孫兆診之為分別陰陽內外辯甚不知將軍在坐或以摘語兆兆不已請將軍為審

脉將軍曰顧頌論脉乎視其狀表裏俱病法所不治為言後日證驗如是兆愕然曰精至是邪且譎語曰我特不欲驚病者尔自是名聲藉動人或曰兆獨不辨為李醞乎將軍恐去歷關陝所療治尤驗寧塞延檢病若暍者二十三日旁近醫皆以暍治將軍聞而笑曰西方地高寒而人辛食寧有是汗之明日瘡過大通城與監兵者飯將軍曰君風氣暴至吾行不可留盍亟求醫監兵不信後二日疾作死廓州太守子病嘔血將軍為治



良已私語人曰肝氣竭矣其無以春夏乎春復作夏而死將軍之醫深於天運地氣人事之變者類如此嘗遊華山雲臺觀為衆道士治疾忽一人衣弊絮形質斬秀躍出衆前曰聞君天下名醫試診我如何將軍為診曰先生六脉俱陽服金石丹砂乎曰否將軍曰神仙六脉俱陽先生殆是耶其人振手大笑忽不見古之良醫亦嘗有鬼神已疾者如將軍親為至人所試尤極奇異年七十三卒以大觀戊子十月壬午塋以十二月壬寅以

子唐顯乃贈官曾祖覺祖祥父隨配張氏李氏子三廣未仕權早卒唐武功大夫河北第二副將女三皆嫁士人孫男五敦仁承節郎安仁居仁體仁擇仁女孫三曾孫四俱幼始將軍嘗謂諸子曰古人云醫特意耳慮精則得之醫之妙不可以言傳而人命所繫陰有報應得之精不若不學所謂醫者費人是也吾平生未嘗以金石藥取近功而忽遠禍噫將軍可謂長者已昔太倉公以刑罪當傳西至長安五女隨而泣公怒罵曰生女



不生男緩急無可使者今將軍之子克自奮發積戰多取勇爵既返榮將軍以四品官而猶未艾也然則長者之報豈不豐哉余同郡李安道頗言唐鷲勇有將畧以氣自負此當任子先其孤姪余曰此功名富貴人也元城張氏三世明經不過州佐縣令而萬福以騎射征伐祿食七十年歷刺九州圖像凌煙今姚氏世長者而唐又能如斯所稱道里福不足慕也可不勉邪故為次將軍之事表于墓云政和八年閏九月二十四日翰林學

士朝奉郎知制誥兼侍讀王某撰并書

故簽書大名府判官廳公事周之美墓誌銘

元豐初朝請大夫安陽周侯奉使河北余實從之其行方而有常言約而盡當官行法及在廷論事意多以為民一時諸公長者皆下之丞相忠獻韓公同州里最相傾倒大夫諸子出拜必罄折謝曰賢者宜有後吾不敢易也大夫顧愛長子甚異時緣使事按部必與之俱而余亦未嘗不在行同飲食起居頗詳其為人大夫既沒



能以謹厚守家法者果其長子則今簽書君是也政和  
初余主北門筦籥當辟屬府領縣十三民夥事劇乃奏  
君簽書判官廳公事亟蒙賜可河防法府縣官須冬赴  
事所藉賴不可緩則又列于朝有旨聽君即日之官  
皆非常典也明年十二月二十三日君卒于官其孤以  
其喪歸請余銘其墓曰銘周氏先世者皆名臣鉅公願  
公勿辭余早從大夫游晚又得君為寮追惟終始存歿  
之分乃叙而銘之君諱之美字彥聖世占籍趙郡有

自棘徙者遂為安陽人曾大父諱文舉贈衛尉卿大父  
諱孝恭贈職方員外郎考即大夫諱草後以君陞朝贈  
朝議大夫君弱不好弄既長志於學而身佩子職獨慨  
然曰子無憂於親不亦孝乎在事不問勞逸熙寧中恩  
補太廟齋郎調潞州潞城尉再調相州臨漳尉以山南  
東道節度使推官知耀州華原縣事親老不赴易知懷  
州河內縣事為淮南節度推官用薦者改宣德郎充河  
北京東監事司勾當公事以憂去服除再充職閱月改河



北糴使司勾當公事遂從辟大名再還至奉議卽賜六品服潞城眉山臨漳阻河盜所區走君至勤邏察嚴捕逮所執獲甚衆無留境中有河內病沁水將壞城邑君兩宿隄上為增卑培薄水不能冒民至今頌之嘗訊盜疑其孱尪因曰曰毋老苟生詐悍不顧法者君憐之為讞群盜得不死語其類曰有宰如是忍犯乎徃徃引去且書邑門曰公去乃來民有自刑訟田者君曰彼偽以怖吏獨奈何自殘邪訟者情得立自來服和州貧民占水

田千餘頃豪右請於官曰陸田而奪有之民訴于省監司前後委吏十數輩審定悉歸請者至是君自淮南懷檄徃或有以薦章撼君者君曰已纔利毛髮顧欲亂水陸以困貧民率還其舊監司猶欲薦君君辭之且推與偕進者衆竒其節及為屬官不嗾其長以利害人授事輒辦以益息增羨預修城守器具皆被賞典最後佐余幕府夙夜自竭盡以幹公相欣殊不少懈雖病益力自余與僚友皆勸君在告君初佛聽病且革猶咄咄為



省文書狀死之日家無餘資余為具後事議者悉歡君之勤且廉然後知余之辟君不專以舊也君享年五十有九娶路氏先君卒贈仙居縣君再娶史氏封永壽縣君子男七人曰貽慶曰相即曰四相曰楊僧皆蚤卒曰琪疑貢士業曰璫曰瑀尚幼女二人進士劉師孟輩康仁則其壻也永壽君與琪卜以政和八年三月九日塋君于感化鄉之先塋惟君性易直行已有耻篤于孝慈待親疾至經時不解帶第求析產既盡則更以已分田益之自甘于貧姊嫁楊元衡有二子數歲俱亡四親寓許下僧舍君為買地塋之鄉里頃大飢流殍踵道君傾資令人痊露皆以千計君用意近古又憑世德之厚而所享止此亦可哀已銘曰 周先邑國氏周而京仁家陽陵顛食武城扶疏累葉耀其華英散遷於北有間衛卿施及厥嗣既自趙徙由相而顯惟君父子凜然遺直吾昔猶及君有典刑樸厚廉飭涓涓其流未究其澤披之語之待其培植惟爾後人視此沉刻



崔志亨墓誌銘

士而自修初不期於有獲而在理為可必者豈泊然處  
 無異於求哉至於可必之理終不足恃則放乎衆人之  
 所不馳以達吾之心庶幾得來之可忘而舒愉間曠之  
 氣足以養體而輔生不幸而又致於自病或者文學行  
 義所以取顯而不必顯優游嘯咏所以為樂而不必樂  
 吾然後知夫命之果有制也博陵崔志亨五歲知讀書  
 晝夜不輟未冠入太學志甚厲業成籍北都外監論辯

英發筆力橫鶩以教者每見嗟賞屢貢禮部頗出奇  
 銳不肯與人相行級既報罷自誦所試音節琅琅聚聽  
 者聳然許之初志亨之祖官南賓所部戍兵思歸志亨  
 構茅屋崖谷間榜曰快意日奉其祖盤礴亭上為文盛  
 道山川之勝若不欲去者戍兵喻其指欣為留屯祖亡  
 爾足扶親歸親有疾封股肉餌之服喪毀甚於後母尤  
 盡孝至瀝指血書梵號以薦福叔與二弟前歿睦發字  
 孤同爨三十年無恩怨厚薄嫌舅張南夫以窮歸志亨



為共有無終則以已地墓之且嫁養其三女鄉里歲飢以家資瘞殍皆數百清平博平嘗以經明行修舉會科罷不行而志亨既不遇合因悼前猛就潛心學易州訓傳攷觀春秋深意築存室里第檜竹茂處把酒賦詩陶然無復進取計俄苦風痺便廢此事以政和三年十二月某日卒享年六十有五諡命也已志亨一名冲其先隸州人徙居大名之清平曾祖卒贈右監門衛大將軍妣卜氏贈永昌縣太君祖懷忠西京左藏庫副使妣李

氏封永安縣君考問故三班奉職姚劉氏志亨娶魏畧楊氏子三人曰安時隸貢生葉曰安雅曰小僧蚤亡孫二人曰百川百彊孫女三人皆幼安時奉母命以四年三月三日墓志亨於博平之先塋求誌其墓某兩姑歸志亨之弟圖南名博兄弟皆以豪邁為吾先君之所稱為作銘曰維師太公燕及孫子穆伯邑崔因邑命氏博陵仲牟立如是似降駟及鈞封植根柢迄唐仁師又世十二從棣遷魏濯濯條枝兄弟敏文自堂塾基志亨



金定四庫全書  
卷十  
老成人莫敢疵負能弗售病又廢之身不逮身其後人  
施勉哉傳承念此刻詞

雜著

祭宋龍圖文

昔元憲公暨其仲氏鴻筆大典焜照一世伯公嶸嶸遂  
都相位勲書太常事載大使機雲餘風王謝高致施于  
子孫隱然國器維公英特絕類離倫忠孝天庭名聲日  
新庖丁解牛奏刀如神飛黃爾雲萬里騰振降才之殊會

遇聖辰崇寧親政首正帝畿肇建四輔內尊京師公持  
漕節知無不為經營申畫弗亟弗遲帝用是嘉寵渥沓  
施既登禁路遂長天府輦轂事劇紛至如雨公舉有綱  
風行指顧聲威整整誰敢予侮決遣如流備形上語趙  
張三王不見比數公俄外遷險夷一德卧治淮揚來繼  
汲直發軌嚴近且在朝夕奄忽訃聞中外嗟惻文階極  
品內朝秘職贈賻加等申賁寔窅念我宗衮元憲輩流  
黃緣及我早從公游姻婭通家情文相投別日幾何六



見索秋公今脫屣逝去莫留生存華屋零落山丘惟公  
術業未及經濟流慶所鍾當在後嗣法從之賢德實肖  
似相門榮華有隆無替我獨懷公撫舊涕泗為國惜才  
豈但存義遣詞徃奠必歆此意尚饗

祭張樞密文

伏以河洛圖書國之重器慶雲景星為時祥瑞北方賢  
哲抑即其次惟公聞望高出一世在昔孔門其科有四  
德行文學言語政事雖淵騫徒鮮能大備公其兼之曼出

倫類神宗教養人材比肩閭閻秩秩莫非俊賢公游太  
學若麟鳳然策名委質綽有譽處席據師儒聲諧詔

護王命肅將澄清使路崇觀天子緝熙王度鶴書蒲輪  
召自公府帝曰汝賢視草西掖亟登玉堂揮大手筆文  
章爾雅渾然天墳細轄中臺青天白日博聞多見沃心  
造膝帝知其忠謂宜輔弼進長樞廷以贊宥密有謀有  
功威制羗戎飯章土宇舟車所通秉公以不懈堂堂古風  
君臣道合千載一逢云何不弔我民無祿道路咨嗟百



身何贖昔我與公同預政機聞訃之來泣涕連沍匍匐  
欲往聞寄是縻寓辭千里以有一危尚饗

祭唐元伯文

維年月日具位王某謹以清酌庶羞之奠致祭于故唐  
君元伯之靈嗚呼造物者之所賦蓋人為之限量苟於  
此而慳靳要莫加於銖兩或所靳之莫獲則幾何其不  
喪如元伯之豈弟承世德之端亮以君子之流澤宜鬼  
神之多相今奄忽其已矣予始知其情狀公得官於少

日我坎壈而踰壯中年艱於子息慨嗣路之徒廣忽遇  
合而從事積九遷之憂賞從稚兒之駸鬢呱復啼於襍  
襁猶蘭茁其未艾而幕功之頌上雖怪事之咄咄固已  
賞於疇曩覩有無之相易信果難於兼享此盈虛之至  
數非予言之敢忘維士窮而無託嗟欲進而難強猗所  
託之碩大更睽離而跌宕逮如初而復盡曾心期之無  
爽垂九萬而跼翼乃齋志於泉壤目臨絕而不瞑獨嫪  
戀於母養邈荆渚於天末喟帑重其曷嚮肯先子之棄



予公實臨其窆，葬帳訃音之來，及畏簡書而莫往，涕潛然而無從，空引脰以北望，馳薄奠以寓哀。尚年生之可相尚饗。

祭崔志亨文

維年月日北獄王某謹遣人以清酌之奠，致祭於故崔六丈志亨之靈。惟靈學問成於妙年，孝友稱於一鄉。軒竒磊落，既自許以氣節，扶踈勃鬱，又大播於辭章。宜青紫之俯拾，指寥廓而高翔。顧皎皎之不逝，卒踳踳而歸藏。惟興寄之超然，友千載而相羊。兀醉吟以終日，哆餘瀝之淋浪。疑可以適志而引年，追荷篠而侶柴桑。病奄奄其此廢，曾為樂之。不長今遂往而不返，豈易度於彼蒼。念昔予之諸姑配季子之頡頏，倏姻連之四紀。凜宰木之几霜，憶先君之携予，隨鄉賦于大梁。予齟齬而工文，娛二老於隣房。比懷檄於魏博，過里門而登堂。覩巾拂之歌，脫屹婢僕之扶林。如美疢之加劇，果藥石之無良。歲行盡而訃聞，益感舊而慨傷。閔外妹之孑立，諒恩拊之



曷忘氣忽上而填膺淚落下而沾裳聊寓哀於短詞持  
往侑於一觴尚饗

祭周僉判文

君悃悞無華克勤乃事持身潔廉內視不愧自官州縣  
所至輒治及為使屬弗近聲利來游吾幕夙盡瘁朴  
直之氣發於論議念昔先公見謂國器迨我晚遇樂友  
賢嗣板援自助施報之義雖無老成典刑可記今君云  
亡撫舊出涕凡我同僚邂逅相值忽喪其一衆嘆曰喟

寓哀薄奠君歆此意尚饗

祭右院魏判官文

為大名  
同官作

嗚呼以端夫好學業文豈不足以顯親而榮身顧間聞  
場屋殆餘一紀始奏名於大宗伯而以晷刻之淹留成  
三歲之逡巡其後解褐試吏漢東曾受祿之未幾忽禍  
罰之來臻迫除喪而仕魏適今期年奄其逝矣嗟志願  
之莫伸嗚呼端夫邯鄲之人也豈黃梁之夢果倏忽而  
覺而造物者聊戲子以自神冥冥之理既不可問惟吾



端夫溫潤和雅向僚友以傾盡既久處而情親雖出涕  
其何益而吾儕潛然于丹旒之前者徒悲其白屋自立  
之難百不一就不忽其子幼家貧而已爾嗚呼哀哉尚  
饗

請梁才甫詣狄公廟祈雨劄子

某伏覩近日寺觀祈雨精意感通數有雲霓之應而甘  
澤未霈民心焦然某二十六日至城南迓李真州俟于  
狄公祠下見故相國程公琳禱雨祝詞故龍圖王公廣

淵大書于石題其後畧云丞相精心為詞躬禱廟所即  
日護應遂大有秋都人德丞相而神梁公今錄于左方  
某謹按梁公有唐名臣時以謂北斗以南一人而已方  
武后盜國廬陵廢處唐室不絕如緹梁公引誼屢爭瀕  
死不悔武后感悟三思不得立廬陵復為皇太子又引  
張柬之卒興桓彥範等誅二張立中宗呂溫為之贊曰  
取日虞淵洗咸池潛受五龍夾之以飛史臣以為名言  
公嘗為魏郡守民懷其惠唐高適過魏三作三君誄其



一乃詠梁公祠蓋自唐以來廟食如此昔者共工后稷  
契禹之屬皆祀以為土穀之神傳說為列星荀顛為太  
山君柳子厚為羅池神以公忠義慷慨再造唐室其精  
爽不昧必能庥其所嘗泣之國故張乖崖以窮歸范文  
正以辭贊而程相國以旱禱雲漢之詩以旱既太甚則  
靡神不宗今道釋之禱已罄而忠賢之祀未舉某竊遲  
之漢東海有教婦寃死郡中枯旱三年于公白太守殺  
牛自祭孝婦因表其墓天立大雨歲熟郡中以此重于

公夫以匹婦之靈且能致雨况如梁公近古大賢以程  
相國之事觀之其效可見欲乞更賜詢考涓日潔齋備  
盡誠懇請雨於梁公祠下庶幾早霑嘉澤無害西成

大名狄梁公廟祈雨文

代梁帥

維公忠貫天地氣勁金石伏羲蹈險凜凜一德武孽鳴  
晨唐曰中蝕公徐請命賈血橫臆廬陵既還五龍來翼  
大明升照匪公孰力扶顛之功草木所知寧豐汝南罔  
不懷思魏人載德百世奉祠獨賢斗南豈但一時維此



魏人所欲必告農功穡事有相之道今茲之稼既方既  
阜迨天閔雨民憂用禱維古上公神道陰陽吁噓而雩  
抑有故常公降自天去復騎星留游舊都髣髴英靈某  
在茲居守神交冥冥忠義之感尚想典刑胡不慨然吸  
呼雷霆流惠焦槁與之蘓醒儻雷嘉澤歲得上熟自公  
及私異世蒙福祠庭之完奉嘗之續率民報貺當罄祇  
肅

大名諸廟謝雨文

冬煖之餘春澤未降吏用慄慄禱歲于道釋真聖之宮  
迺者辛未之夕陰雲勃鬱壬申之旦膏雨飄灑鳴溜涓  
續盡三日止滄滋下達及一犁外間霏霰雪消癘疫也  
亟歛氛霧舒陽和也造物功巧若與人謀詩曰上天曰  
雲雨雪雰雰益之以霡霂既優既渥既霑既足蓋言雨  
雪之兼至不暴不徐能生百穀惟<sup>神</sup>哀之則農年之望靡  
愆農勸其功吏緩其咎並受休貺敢忘報禮

河間諸廟祈雨文

代張帥



惟帝奉天保民惟天畀民粒食惟民殫力于穡帝克聖  
天克純佑民罔不承休于四方亦既屢有年有一不登  
則吏底于蜀夫民何咎矧茲兩河北索于秋事冬不雪  
春亦亢旱今乃重靳甘雨將害民之麥禾吏以慄慄候  
雲霓之油然氣方淒而風陰甫合而霽抑吏之精意未  
達於神與乃以吉日奔走群祀伏冀憫哀斯民亟昇膏  
澤甦其枯槁同底豐穰庶幾歲不游艱吏亦靡悔

祈晴文

伏以天道不言而應孰窺降鑒之神暑雨小民惟咨成咸  
切昇矜之望睠茲燕土初沐華風兵火之餘麥禾是賴  
障塞之備版築方興忽霖潦之彌旬實農夫之昏病矧  
諸路轉輸之遠與三軍戍役之勤雖邈在於封疆慮仰  
貽於宵旰大勲既集宜善氣之應和小信未孚蓋邊臣  
之獲戾敢潔祈禳之薦用干生毓之私伏望覆以恩慈  
閔其劬瘁開陽光而普照斥陰沴以潛消儻崇降於罪  
殃願鍾小已遂密移於造化以迄康年



一、臣等謹將...  
 二、...  
 三、...  
 四、...  
 五、...  
 六、...  
 七、...  
 八、...  
 九、...  
 十、...





書